

摘藻堂四庫全書薈要

史部

欽定四庫全書薈要

史部

資治通鑑卷二百二十一

詳校官編修臣汪鏞



欽定四庫全書薈要卷七千二百七

史部

資治通鑑卷二百二十一 宋 司馬光 撰

胡三省 音註

唐紀三十七

起屠維大淵獻盡上章困敦凡二年

肅宗文明武德大聖大宣孝皇帝下之上

乾元二年春正月己巳朔史思明築壇於魏州城北自

稱大聖燕王以周摯為行軍司馬

考異曰河洛春秋作周萬至邠志作周

至舊傳作周贊今從實錄

李光弼曰思明得魏州而按兵不進此欲

使我懈情而以精銳掩吾不備也請與朔方軍同逼魏

城求與之戰彼懲嘉山之敗

嘉山之敗事見二百十八卷至德元載

必不

敢輕出得曠日引久則鄴城必拔矣慶緒已死彼則無

辭以用其衆也魚朝恩以為不可乃止

使用光弼之計安有滏水之潰

乎朝直

戊寅上祀九宮貴神

李心傳曰九宮貴神者太一攝提軒轅招搖天

遙翻

符青龍咸池太陰天一宋白曰九宮貴神其說本之黃帝九宮經蕭吉五行大義

用王璵之言

也乙卯耕藉田

乙卯當作乙酉

鎮西節度使李嗣業攻鄴城

為流矢所中

中竹仲翻

丙申薨兵馬使荔非元禮代將其衆

將即亮翻初嗣業表段秀實為懷州長史知留後事

李嗣業以鎮西

北庭兵屯懷州會師攻鄴以段秀實知留後事

時諸軍屯戍日久財竭糧盡秀實

獨運芻粟募兵市馬以奉鎮西行營相繼於道二月

壬子月食既

春秋之法書日食不書月食日君象也此因張后之專橫而書月食記日男教不脩

陽事不得謫見於天日為之食婦順不脩陰事不得謫見於天月為之食是故日食則天子素服而脩六官之職蕩天下之陽事月食則后素服而脩六官之職蕩天下之陰事故天子之與后猶日之與月陰之與陽相須而成者也是後月食

先是百官請加皇后尊號曰輔聖

皆書於目錄上方

先悉薦翻考異曰舊紀作翊聖今從實錄

上以問中書舍人李揆對曰自

古皇后無尊號惟韋后有之

韋后事見二百年
卷中宗景龍元年

豈足為

法上驚曰庸人幾誤我會月食事遂寢后與李輔國相

表裏橫於禁中

幾居依翻
橫戶孟翻

干豫政事請託無窮上頗不

悅而無如之何

郭子儀等九節度使圍鄴城築壘再

重穿塹三重

重直
龍翻

壅漳水灌之城中井泉皆溢構棧而

居自冬涉春安慶緒堅守以待史思明食盡一鼠直錢

四千淘牆戮及馬矢以食馬

戮與職翻先以麥戮雜土
築牆今圍急乏芻故淘戮

以飼馬食
祥吏翻

人皆以為克在朝夕而諸軍既無統帥

帥所
類翻

進退無所稟

稟稟令也稟必錦翻行軍進退必稟令於主帥今諸軍無所稟也

城中人

欲降者礙水深不得出

降戶江翻

城久不下上下解體

師老勢屈

故解體

思明乃自魏州引兵趣鄴

果如李光弼之言趨七喻翻

使諸將

去城各五十里為營每營擊鼓三百面遙脅之又每營

選精騎五百日於城下抄掠

騎奇寄翻抄楚交翻

官軍出輒散歸

其營諸軍人馬牛車日有所失樵採甚艱晝備之則夜

至夜備之則晝至時天下饑饉轉餉者南自江淮西自

并汾舟車相繼思明多遣壯士竊官軍裝號督趣運者

趣讀
曰促

責其稽緩妄殺戮人運者駭懼舟車所聚則密縱

火焚之往復聚散自相辨識而官軍邏捕不能察也

邏即

佐翻由是諸軍乏食人思自潰思明乃引大軍直抵城下

觀史思明用兵所謂盜亦有道焉

官軍與之刻日決戰三月壬申官軍

步騎六十萬陳於安陽河北

陳讀曰陣下布陳同蓋水逕安陽縣而東流謂之安

陽河思明自將精兵五萬敵之

將即亮翻

諸軍望之以為遊軍

未介意思明直前奮擊李光弼王思禮許叔冀魯炆先

與之戰殺傷相半魯炆中流矢

中竹仲翻

郭子儀承其後未

及布陳大風忽起吹沙拔木天地晝晦咫尺不相辨兩

軍大驚官軍潰而南賊潰而北棄甲仗輜重委積於路

史言淦水之戰天未悔禍非戰之罪使皆如李光弼
吐思禮在亂能整則其失亡不至於甚重直用翻子

儀以朔方軍斷河陽橋保東京斷音短戰馬萬匹惟存三

千甲仗十萬遺棄殆盡東京士民驚駭散奔山谷留守

崔圓河南尹蘓震等官吏南奔襄鄧守式又翻襄鄧二
州屬山南東道

諸節度各潰歸本鎮士卒所過剽掠剽匪
妙翻吏不能止旬

日方定惟李光弼王思禮整勒部伍全軍以歸考異
曰邵志

曰史思明自稱燕王牙前兵馬使吳思禮曰思明果反
蓋蕃將也安肯盡節於國家因目左武鋒使僕固懷恩
懷恩色變陰恨之三月六日史思明輕兵抵相州郭公
率諸軍禦之戰于萬金驛賊分馬軍並淫而西郭公使
僕固懷恩以蕃軍馬軍邀擊破之還遇吳思禮於陣射
殺之呼曰吳思禮陣沒其父叔軍郭公疑懷恩為變遂
脫身先去諸軍相繼潰于城下今從實錄

子儀至河陽將謀城守師人相驚

又奔缺門

水經注穀水出弘農澠池縣南又東逕新安縣故城南又東逕千秋亭南又東逕缺門山

山阜之不接者諸將繼至衆及數萬議捐東京退保蒲

陝將即亮翻捐千專翻陝失冉翻蒲陝二州都虞候張

先河潼關控其險可以禦敵故議退保之

用濟曰蒲陝荐飢不如守河陽賊至併力拒之子儀從

之使都游奕使靈武韓遊瓌將五百騎前趣河陽

使疏吏翻

壞古回翻騎奇寄翻趣七喻翻

用濟以步卒五千繼之周摯引兵爭河

陽後至不得入而去用濟役所部兵築南北兩城而守

之

是後李光弼雖斬張用濟而守河陽則實張用濟定計於其先也

段秀實帥將士妻

子及公私輜重自野戍渡河待命於河清之南岸

野戍即野

水渡置戍守之因謂之野戍河清縣本屬河南尹本大

基縣武德二年置八年省咸亨四年復分河南洛陽新

安王屋濟源河陽置大基先天元年更名河

清帥讀曰率將即亮翻輜莊持翻重直用翻

至而軍焉諸將各上表謝罪

上持掌翻

上皆不問惟削崔圓

階封

崔圓先封趙國公實封戶五百國公從一品階比開府儀同三司

貶蘓震為濟王

府長史削銀青階

濟王環上弟也濟于禮翻長知兩翻

史思明審知官軍

潰去自沙河收整士衆還屯鄴城南

史思明之兵潰而北去至沙河知官

軍的去乃收整其衆而南使官軍於滏水驚潰之後各能收兵還營堅壁而圍守鄴城思明未敢南也沙河縣隋分龍岡縣置唐屬邢州在鄴城西北二百餘里還音旋又音如字安慶緒收子儀營中

糧得六七萬石與孫孝哲崔乾祐謀閉門更拒思明諸

將曰今日豈可復背史王乎

復扶又翻背蒲妹翻

思明不與慶緒

相聞又不南追官軍但日於軍中饗士張通儒高尚等

言於慶緒曰史王遠來臣等皆應迎謝

應乙陵翻

慶緒曰任

公暫往思明見之涕泣厚禮而歸之經三日慶緒不至

思明密召安太清令誘之

楚與暫同令力丁翻誘音酉

慶緒窘蹙不

知所為乃遣太清上表稱臣於思明請待解甲入城奉

上璽綬

窘巨隕翻上時掌翻璽斯氏翻綬首受

思明省表曰何至如此因

出表徧示將士咸稱萬歲

省昔景翻思明出慶緒表徧示將士以觀其情向肯乃

手疏言慶緒

疏所據翻言魚戰翻弔生曰言

而不稱臣且曰願為兄弟

之國更作藩籬之援鼎足而立猶或庶幾北面之禮固

不敢受并封表還之慶緒大悅因請軟血同盟思明許之

慶緒以三百騎詣思明營思明令軍士擐甲執兵以待之

幾后希翻軟色甲翻
騎奇計翻擐音宦

引慶緒及諸弟入至庭下慶緒再拜

稽首曰臣不克荷負

稽音啟荷下
可翻又如字

棄失兩都久陷重圍

重直
龍翻

不意大王以太上皇之故

慶緒尊祿山為太上皇
見二百十九卷至德元

戴遠垂救援使臣應死復生

復扶又翻
又如字

摩頂至踵無以

報德思明忽震怒曰棄失兩都亦何足言爾為人子殺

父奪其位天地所不容吾為太上皇討賊

吾為音
于偽翻

豈受

爾佞媚乎即命左右牽出并其四弟及高尚孫孝哲崔
乾祐皆殺之張通儒李庭望等悉授以官思明勒兵入
鄴城收其士馬以府庫賞將士慶緒先所有州縣及兵
皆歸於思明遣安太清將兵五千取懷州因留鎮之思
明欲遂西略慮根本未固乃留其子朝義守相州朝直
引兵還范陽甲申回紇骨啜特勒帝德等十五人自

相州奔還西京上宴之於紫宸殿

宋敏求長安志宣政殿北曰紫宸門門內

有紫宸殿即內衙之正殿

賞賜有差庚寅骨啜特勒等辭還行營

辛卯以荔非元禮為懷州刺史權知鎮西北庭行營節度使元禮復以段秀實為節度判官

復扶人翻

甲午以兵

部侍郎呂諲同平章事乙未以中書侍郎同平章事苗

晉卿為太子太傅王璵為刑部尚書皆罷政事以京兆

尹李峴行吏部尚書中書舍人兼禮部侍郎李揆為中

書侍郎及戶部侍郎第五琦竝同平章事上於峴恩意

尤厚峴亦以經濟為已任軍國大事多獨決於峴

為李輔國

忌峴不得久於相位張本

於是京師多盜李輔國請選羽林騎士五

百以備巡邏

羅郎佐翻

李揆上疏曰昔西漢以南北軍相制

故周勃因南軍入北軍遂安劉氏

周勃安劉事見漢高后紀李揆謂勃因南

軍入北軍考其本末恐不如此

皇朝置南北牙文武區分以相伺察今

以羽林代金吾警夜忽有非常之變將何以制之乃止

金吾衛屬南牙羽林衛屬北牙金吾掌巡徼李輔國欲以羽林軍奪其職故李揆以為言朝直遙翻

丙

申以郭子儀為東畿山東河東諸道元帥權知東京留

守

東畿謂東京畿山東謂河南河北河東自蒲絳北至并代

以河西節度使來填行

陝州刺史充陝虢華州節度使

來填徙河西未行而相州師潰因使之鎮陝以

守關然瑱尋徙
襄陽華戶化翻

夏四月庚子澤潞節度使王思禮破

史思明將楊旻於潞城東

潞城縣屬潞州隋開皇十六年置春秋潞子所邑也九城

志潞城在潞州東北四十里

太子詹事李輔國自上在靈武判元

帥行軍司馬事侍直帷幄宣傳詔命四方文奏寶印符

契晨夕軍號一以委之及還京師專掌禁兵常居內宅

內宅蓋在禁中輔國止宿之署舍也

制勅必經輔國押署然後施行宰相

百司非時奏事皆因輔國關白承旨常於銀臺門決天

下事

雍錄按六典制大明宮圖有左右銀臺門左銀臺門直紫宸殿之東右銀臺門直紫宸殿之西又考

閣本大明宮圖右銀臺門內即翰林院麟德殿又東歷
內侍別省延英殿光順門而後至紫宸殿自左銀臺門
西入歷溫室浴堂殿綾綺殿而後至紫宸殿紫宸殿在
宣政殿後當大明宮正中右銀臺門在宮城西面左銀
臺門在宮城東面以地望
準之正直紫宸東西耳

事無大小輔國口為制勅寫

付外施行事畢聞奏又置察事數十人潛令於人間聽察
細事即行推案有所追索諸司無敢拒者御史臺大理寺
重囚或推斷未畢輔國追詣銀臺一時縱之

索山客翻
斷丁亂翻

三司府縣鞠獄皆先詣輔國咨稟輕重隨意稱制勅行
之莫敢違者宦官不敢斥其官皆謂之五郎李揆山東

甲族見輔國執子弟禮謂之五父

李揆裔出隴西其先客居榮陽遂為山東

甲族李輔國第五

及李峴為相於上前叩頭論制勅皆應由中

書出具陳輔國專權亂政之狀上感寤賞其正直

峴戶典翻

相息亮翻

輔國行事多所變更

更工衡翻

罷其察事輔國由是讓

行軍司馬請歸本官

本官太子詹事

上不許制比緣軍國務殷

或宣口勅處分

比毗至翻處昌呂翻分扶問翻

諸色取索及杖配囚徒

自今一切並停如非正宣並不得行

索山客翻正宣宣命凡出宣命有底

在中書可以檢覆謂之正宣

中外諸務各歸有司英武軍虞候及六

軍諸使諸司等比來或因論競懸自追攝

英武軍殿前射生手也置

虞侯以統之六軍北門六軍也諸使內諸使也諸司內諸司也使疏吏翻論盧昆翻

自今湏一切

經臺府

臺御史臺府京兆府

如所由處斷不平

茂昌呂翻斷丁亂翻

聽具狀

奏聞諸律令除十惡殺人姦盜造偽外餘煩冗一切刪

除仍委中書門下與法官詳定聞奏輔國由是忌峴

考

異曰實錄李峴傳曰時李輔國專典禁中兵權詔旨或不

由中書而出峴切陳其狀肅宗甚嘉之即日下詔如峴奏由是挫輔國威權輔國頗忌之蓋即此詔也

甲辰置陳鄭亳節度使以

鄧州刺史魯吳為之以徐州刺史尚衡為青密七州節

度使

七州青密登萊淄沂海吳火迴

以興平軍節度使李奭兼豫許

汝三州節度使仍各於境上守捉防禦

陳鄭毫前此未嘗置節鎮魯吳

自南陽為之青密等七州尚衡自彭城升統之興平軍本置於雍州始平縣李奭時在行營使統豫許汝三州此皆臨時分鎮非有一定規模也九節度之潰於相州也魯吳所部兵

剽掠尤甚

剽匹妙翻

聞郭子儀退屯河上李光弼還太原吳

慙懼飲藥而死

還從宣翻又音如字

史思明自稱大燕皇帝改元

順天

燕因肩翻上元三年春二月思明懷西役之謀慮北地之變

乃今男朝義留守相城自領士馬歸范陽因僭號後燕改元順天元年按實錄此年正月一日思明稱燕王立

年號實錄舊傳皆不載所改年名紀年通譜此年即思
明順天元年柳璨正閏位歷思明有順天應天二號按
薊門紀亂思明既殺烏承恩不稱國家正朔亦不受廢
緒指麾境內但稱某月而已乾元二年四月癸酉思明
僭位於范陽建元順天國號大燕立妻辛氏為皇后次
子朝興為皇太子長子朝義為懷王六月於開元寺造
塔改寺名為順天上元二年正月癸卯思明大赦改元
應天實錄云正月立年號河洛春秋云上元三年僭號
薊門紀亂云立朝興為太子按思明欲立少子為太子
左右泄其謀故朝義弒之紀亂云於時已立為太子誤
也按長歷四月

丁酉朔無癸酉

立其妻辛氏為皇后子朝義為懷王以

周摯為相李歸仁為將

朝直遙翻相息亮翻將即亮翻

改范陽為燕京

諸州為郡 戊申以鴻臚卿李抱玉為鄭陳潁亳節度

使

臚凌如翻
使疏吏翻

抱王安興貴之後也

安興貴見一百八十七卷高祖武德二年

為李光弼裨將屢有戰功自陳恥與安祿山同姓故賜

姓李氏 回紇毗伽闕可汗卒長子葉護先遇殺國人

立其少子是為登里可汗

紇下沒翻伽求迦翻長知兩
翻少始照翻可從刊八聲汗

音寒卒
子恤翻

回紇欲以寧國公主為殉公主曰回紇慕中國

之俗故娶中國女為婦若欲從其本俗何必結昏萬里

之外邪

邪音耶

然亦為之勞面而哭

漢北之俗死者停屍
於帳子孫及親屬男

女各殺牛馬陳於帳前祭之遠帳走馬七匝詣帳門以
刀勞面且哭血淚俱流如此者七度乃止為子偽翻勞

里之
翻

鳳翔馬坊押官為劫

押官者管押馬坊之官

天興尉謝夷

甫捕殺之

天興縣本古雍縣至德二載改曰鳳翔仍分置天興縣帶鳳翔府

其妻訟冤

李輔國素出飛龍廐

李輔國本飛龍小兒

勅監察御史孫鑒鞠之

無冤

監古銜翻鑒余頌翻又烏定翻

又使御史中丞崔伯陽刑部侍郎

李暉大理卿權獻鞠之

此唐制所謂小三司也

與鑒同猶不服又

使侍御史太平毛若虛鞠之

太平縣屬絳州魏太武帝置秦平縣周改為太平因

太平關城為名

若虛傾巧士希輔國意歸罪夷甫伯陽怒召若

虛詰責欲劾奏之

詰去吉翻劾戶槩翻又戶得翻

若虛先自歸於上上

匿若虛於簾下伯陽尋至言若虛附會中人鞫獄不直

上怒叱出之伯陽貶高要尉獻貶桂陽尉

桂陽漢縣隋唐帶連州

曄與鳳翔尹嚴向皆貶嶺下尉

嶺下謂度嶺南下諸縣史失曄向所貶縣名故

云皆貶嶺下尉

鑒除名長流播州吏部尚書同平章事李峴奏

伯陽無罪責之太重上以為朋黨五月辛巳貶峴蜀州

刺史

高辰羊翻峴戶典翻盜發鳳翔管在北軍者

考異曰代宗實錄云屬有詔遣御史訊鞠盜已伏罪

李輔國執奏重覆殿中侍御史毛若虛奏覆與輔國協肅宗大怒下三司推鞠之峴以若虛不直陳於上前及三司覆奏與峴理協肅宗以為朋黨會同列李揆希旨遂貶峴為通州刺史三司大臣皆貶官今從肅宗實錄

舊紀

右散騎常侍韓擇木入對

散悉宜翻
騎奇寄翻

上謂之曰李

峴欲專權今貶蜀州朕自覺用法太寬對曰李峴言直
非專權陛下寬之祇益聖德耳若虛尋除御史中丞威

振朝廷

朝直
遙翻

壬午以滑濮節度使許叔冀為汴州刺

史充滑汴等七州節度使

新書方鎮表汴滑節度使治
滑州領州五滑濮汴曹宋

以試汝州刺史劉展為滑州刺史充副使 六月丁巳

分朔方置邠寧等九州節度使

方鎮表開元九年置朔
方節度使領單于大都

護府夏鹽綏銀豐勝六州定遠豐安二軍三受降城十
年增領魯麗契三州二十二年魚關內道來訪處置使

增涇原寧慶隴鄜坊丹延會宥麟十二州以匡長二州
隸慶州安樂長樂二州隸原州天寶元年增領邠州乾
元元年分鎮北大都護府麟勝二州置振武節度使是
年廢關內節度使罷領單于大都護以涇原寧慶坊鄜
丹延隸邠寧節度邠州本幽州開
元十三年以幽字類幽改曰邠

觀軍容使魚朝恩

惡郭子儀

惡烏路翻

因其敗短之於上秋七月上召子儀還

京師以李光弼代為朔方節度使兵馬元帥

考異曰邠志云四

月肅宗使丞相張公鎬東都慰勉諸軍郭公陳饌於軍
張公不坐而去軍中不悅朋肆流議居十日有中使追
郭公汾陽家傳曰六月公朝于京師三讓元帥上許之
乃詔李光弼代公為副段公別傳曰五月李光弼代子
儀為副元帥守東都今因實錄
士卒涕泣遮中使請留
七月除趙王係為元帥并言之

子儀子儀給之曰我餞中使耳未行也因躍馬而去光弼願得親王為之副辛巳以趙王係為天下兵馬元帥

光弼副之

考異曰舊傳思明縱兵河南加光弼太尉兼中書令代郭子儀為朔方節度兵馬副元

帥以東師委之新傳云帝貸諸將罪以光弼兼幽州大都督府長史知諸道節度行營事又代子儀為朔方節度使未幾為天下兵馬副元帥按實錄光弼加太尉中書令在上元元年破史思明後為幽州都督在此年八月其代子儀節制朔方實錄無月日制辭云宜副出車之命仍踐分麾之寵蓋只在此時耳仍以光

弼知諸節度行營光弼以河東騎五百馳赴東都夜入其軍光弼治軍嚴整始至號令一施士卒壁壘旌旗精

采皆變

史言光弼入朔方軍部分皆因子儀之舊但號令加嚴整耳治直之翻

是時朔方

將士樂子儀之寬憚光弼之嚴

樂音洛

左廂兵馬使張用

濟屯河陽光弼以檄召之用濟曰朔方非叛軍也乘夜

而入何見疑之甚邪與諸將謀以精銳突入東京逐光

弼請子儀命其士皆被甲上馬銜枚以待

被皮義翻上時掌翻

都

知兵馬使僕固懷恩曰鄴城之潰郭公先去

觀懷恩此言則邠志

所云亦可
以傳信

朝廷責帥故罷其兵柄今逐李公而彊請之

是反也其可乎

帥所類翻彊其兩翻又音如字

石武鋒使康元寶曰君

以兵請郭公朝廷必疑郭公諷君為之是破其家也郭

公百口何負於君乎用濟乃止

懷恩此言與康元寶之言皆是也使諸將從張

用濟於惡史思明之兵復至唐事殆矣

光弼以數千騎東出汜水用濟單

騎來謁光弼責用濟召不時至斬之命部將辛京杲代

領其衆

考異曰舊傳曰用濟承子儀之寬懼光弼之令與諸將頗有異議欲逗留其衆光弼以數千

騎出次汜水縣用濟單騎迎謁即斬於轅門諸將懼伏以辛京杲代之復追都兵馬使僕固懷恩懷恩懼先期而至邠志曰五月二十三日詔河東節度使李公代子儀兼統諸軍李公既受命以河東馬軍五百騎至東都夜入其軍張用濟在河陽聞之曰朔方軍非叛人也何見疑之甚欲率精騎突入東都遂李公請郭公李公知

之遂留東都表請濟師于河陽冬十月思明引衆渡河
李公曰思明渡河必圖洛城我當守武牢關揚兵于廣
武以待之遂引兵東出師汜水縣徽追河陽諸將用濟
後至李公數其罪而戮之以辛京果代領其職明日引
軍入河陽按實錄此月光弼為
副元帥九月始移軍河陽耳

僕固懷恩繼至光弼

引坐與語

史言李光弼待僕固懷恩有加於諸將

須臾闇者白蕃渾五百

騎至矣

蕃渾謂諸蕃種及渾種

光弼變色懷恩走出召麾下將陽

責之曰語汝勿來何得固違

將即亮翻語牛倨翻

光弼曰士卒隨

將亦復何罪命給牛酒

史言懷恩成備而後見光弼光弼雖知其情而容忍不發復音

扶又翻

以潞沁節度使王思禮

王思禮節度澤潞沁三州史或稱澤潞或稱潞沁

七鵠
翻

兼太原尹充北京留守河東節度使

代李光弼也

初潼

關之敗

事見一百十八卷至德元載

思禮馬中矢而斃有騎卒盩屋

張光晟下馬授之

中竹仲翻盩音室晟丞正翻

問其姓名不告而

去思禮陰識其狀貌

識音誌

求之不獲及至河東或譖代

州刺史河西辛雲京

雲京蘭州金城人屬河西路

思禮怒之雲京懼

不知所出光晟時在雲京麾下曰光晟嘗有德於王公

從來不敢言者恥以此取賞耳今使君有急光晟請往

見王公必為使君解之

為于偽翻下特為同

雲京喜而遣之光晟

謁思禮未及言思禮識之曰噫子非吾故人乎何相見
之晚邪光晟以實告思禮大喜執其手流涕曰吾之有
今日皆子力也

思禮言光晟授已以馬
脫已於兵得有今日

吾求子久矣引

與同榻坐約為兄弟光晟因從容言雲京之寃

從千
容翻思

禮曰雲京過亦不細今日特為故人捨之即日擢光晟

為兵馬使贈金帛田宅甚厚

張光晟於王思禮可謂君
子矣其後事德宗以失職

怨望遂委身於朱泚
何前後之相違也

辛卯以朔方節度副使殿中監

僕固懷恩兼太常卿進爵大寧郡王懷恩從郭子儀為

前鋒勇冠三軍

冠古坑翻

前後戰功居多故賞之 八月乙

巳襄州將康楚元張嘉延據州作亂刺史王政奔荊州

楚元自稱南楚霸王 回紇以寧國公主無子聽歸丙

辰至京師

公主嫁回紇見上卷上年

戊午上使將軍曹日昇往襄

州慰諭康楚元貶王政為饒州長史以司農少卿張光

奇為襄州刺史楚元不從 壬戌以李光弼為幽州長

史河北節度等使

使之收復河北及幽燕也

九月甲午張嘉延襲

破荊州荆南節度使杜鴻漸棄城走澧朗郢峽歸等州

官吏聞之爭潛竄山谷

時荆南節度使領荆澧朗
郢復夔峽忠萬歸十州

戊

辰更令絳州鑄乾元重寶大錢

唐世鑄錢大凡天下諸
鑪九十九而絳州之鑪

三十其餘諸鑪或隔江嶺或沒

加以重輪一當五十

大錢

寇虜故當時鑄錢率倚絳州

徑一寸二分文亦曰乾元重寶背之外郭為

在京百官

重輪每緡重十二斤號重稜錢重直龍翻

先以軍旅皆無俸祿宜以新錢給其冬料

冬料各官冬
季所當得俸

料錢也

丁亥以太子少保崔光遠為荆襄招討使充山

南東道處置兵馬都使

處昌
呂翻

以陳頴毫申節度使王仲

昇為申沔等五州節度使知淮南西道行營兵馬

時淮
西節

度使領申光
壽安沔五州

史思明使其子朝清守范陽命諸郡太

守各將兵三千從已向河南分為四道使其將令狐彰
將兵五千自黎陽濟河取滑州思明自濮陽史朝義自

白臯周摯自胡良濟河

白臯胡良皆河津濟度之要在滑州西北岸良或作梁濮音卜

會于汴州李光弼方巡河上諸營聞之還入汴州謂汴
滑節度使許叔冀曰大夫能守汴州十五日我則將兵
來救叔冀許諾光弼還東京思明至汴州叔冀與戰不
勝遂與濮州刺史董秦及其將梁浦劉從諫田神功等

降之

許叔冀卒如張鎬之言

思明以叔冀為中書令與其將李詳

守汴州厚待董秦收其妻子置長蘆為質

長蘆漢縣戶縣地後周更

名長蘆縣時屬滄州質音致

使其將南德信與梁浦劉從諫田神功

等數十人徇江淮神功南宮人也

南宮漢古縣屬冀州

思明以為

平盧兵馬使頃之神功襲德信斬之從諫脫身走神功

將其衆來降思明乘勝西攻鄭州

鄭州梁陽郡

光弼整衆徐

行至洛陽謂留守韋陟曰賊乘勝而來利在按兵不利

速戰洛城不可守於公計何如陟請留兵於陝退守潼

關據險以挫其銳

守式又翻陝失冉翻潼音同

光弼曰兩敵相當貴

進忌退今無故棄五百里地則賊勢益張矣

張知亮翻又如字

不若移軍河陽北連澤潞利則進取不利則退守表裏

相應使賊不敢西侵此猿臂之勢也

猿臂可伸而長可夫縮而短故以為喻

辨朝廷之禮光弼不如公

夫音扶朝直遙翻

論軍旅之事公不

如光弼陟無以應判官韋損曰東京帝宅侍中奈何不

守

按李光弼至德之初已為司空乾元元年為侍中故韋損以此呼之

光弼曰守之則汜

水嶧嶺龍門皆應置兵

汜水有成臯之險嶧嶺在登封縣龍門則伊闕汜音祀嶧通各

翻子為兵馬判官能守之乎遂移牒留守韋陟使帥東

京官屬西入關牒河南尹李若幽使帥吏民出城避賊

空其城光弼帥軍士運油鐵諸物詣河陽為守備光弼

以五百騎殿

帥讀曰率
殿丁練翻

時思明遊兵已至石橋諸將請

曰今自洛城而北乎當石橋而進乎光弼曰當石橋而

進

水經注穀水東逕洛陽廣莫門北漢之穀門也東逕建春門石橋下即上東門也此言漢晉洛城諸門北

隋唐所徙洛城也上東門之地唐為鎮

及日暮光弼秉炬徐行部曲堅重

賊引兵躡之不敢逼

躡之者欲其兇懼而自潰不敢逼者以其嚴整而難犯

光弼

夜至河陽有兵二萬

郭子儀自潼水退守河陽衆及數萬及李光弼至河陽有兵二萬何

衆寡之相懸乎蓋張用濟之死朔方士卒畏威而逃散者多也

糧纔支十日光弼按閱

守備部分士卒無不嚴辦

分扶問翻弼謂韋陟曰

洛城無糧不可考異曰實錄光

守按河陽糧纔支十日亦非糧多也今不取

庚寅思明入洛陽城空無所得

畏光弼犄其後

犄居綺翻

不敢入宮退屯白馬寺南築月城

於河陽南以拒光弼

史思明乘銳勝以攻河陽乃於是先築月城者恐戰有邂逅也

鄭滑等州相繼陷沒

思明既至洛陽則鄭滑等州已陷沒矣通鑑因史家成文失於刪修

也

韋陟李若幽皆寓治於陝

冬十月丁酉下制親征

史思明羣臣上表諫乃止 史思明引兵攻河陽使驍將

劉龍仙詣城下挑戰

驍堅堯翻挑徒了翻

龍仙恃勇舉右足加馬

鬣上慢罵光弼光弼顧諸將曰誰能取彼者僕固懷恩

請行光弼曰此非大將所為

光弼之言得體懷恩固心服矣

左右言裨

將白孝德可往光弼召問之孝德請行光弼問須幾何

兵對曰請挺身取之光弼壯其志然固問所須對曰願

選五十騎出壘門為後繼兼請大軍助鼓譟以增氣光

弼撫其背而遣之

既賞其勇而尤賞其有取敵之方略

孝德挾二矛策馬

亂流而進

橫絕流曰亂

半涉懷恩賀曰克矣光弼曰鋒未交

何以知之懷恩曰觀其攬轡安閑知其萬全龍仙見其

獨來甚易之

易以鼓翻

稍近將動孝德揺手示之若非來為

敵者龍仙不測而止去之十步乃與之言龍仙慢罵如

初孝德息馬良久

息馬者使馬力完後而後戰

因瞋目謂曰賊識我

乎龍仙曰誰也曰我白孝德也龍仙曰是何狗彘孝德

大呼

呼火故翻瞋昌真翻

運矛躍馬搏之城上鼓譟五十騎繼進

龍仙矢不及發環走隄上孝德追及斬首攜之以歸

龍仙

恃勇輕敵而孝德出其不意搏之故勝

賊衆大駭孝德本安西番人也思

明有良馬千餘匹每日出於河南渚浴之循環不休以

示多光弼命索軍中牝馬得五百匹

客索山翻

繫其駒於城

內俟思明馬至水際盡出之馬嘶不已思明馬悉浮渡

河一時驅之入城

牝馬慕牝一時渡河北小街耳思明不能制阻河水也

思明怒

列戰船數百艘泛火船於前而隨之欲乘流燒浮橋光

弼先貯百尺長竿數百枚

艘蘓遭翻貯丁呂翻

以巨木承其根氈

裹鐵义置其首以迎火船而义之船不得進須臾自焚

盡又以义拒戰船於橋上發礮石擊之中者皆沉沒賊

不勝而去思明見兵於河清

破匹貌翻中竹仲翻見賢通翻杜佑曰河清縣南臨

黃河欲絕光弼糧道光弼軍于野水渡以備之既夕還河

陽留兵千人使部將雍希顥守其柵

雍於用翻

曰賊將高庭

暉李日越喻文景皆萬人敵也

喻姓也姓譜東晉有喻歸撰河西記

思明

必使一人來劫我我且去之汝待於此若賊至勿與之

戰降則與之俱來諸將莫諭其意皆竊笑之既而思明

果謂李日越曰李光弼長於憑城今出在野此成擒矣

汝以鐵騎宵濟為我取之

為于偽翻

不得則勿返日越將五

百騎晨至柵下希顓阻壕休卒吟嘯相視日越怪之

怪其

無戰意也

問曰司空在乎

李光弼加司空侍中故稱之

曰夜去矣兵幾何

曰千人將誰曰雍希顓日越默計久之謂其下曰今失

李光弼得希顓而歸吾死必矣不如降也遂請降希顓

與之俱見光弼光弼厚待之任以心腹高庭暉聞之亦

降或問光弼降二將何易也

易弋改翻

光弼曰此人情耳思

明常恨不得野戰聞我在外以為必可取日越不獲我

勢不敢歸庭暉才勇過於日越聞日越被寵任必思奪

之矣

此謂之善用其所短孫臏有言善戰者因其勢而利導之

庭暉時為五臺府果

毅

代州有五臺府

已亥以庭暉為右武衛大將軍

唐諸府果毅品秩猶卑諸

衛大將軍則三品矣

考異曰新傳曰上元元年光弼

降賊將高暉李日越按此月已亥高庭暉授特進疑即

高暉也丁巳李日越又授特進是此月皆已降新傳誤

邠志曰二年三月思明引衆南去使其子朝義圍河陽

四月一日思明陷洛城上元元年思明耀兵于河清宣

言曰我且渡河絕彼餉道三城食盡不攻自下李公聞

之師于野水渡既夕還軍

思明復攻河陽

後扶又翻光

與實錄亦相違今從實錄

弼謂鄭陳節度使李抱玉曰

方鎮表乾元二年置鄭陳節度使領鄭陳毫潁四州

然此時鄭州已沒於史思明矣

將軍能為我守南城二日乎

偽于

抱玉

曰過期何如光弼曰過期救不至任棄之抱玉許諾勒

兵拒守城且陷抱玉給之曰吾糧盡明旦當降賊喜歛

軍以待之抱玉繕完城備明日復請戰賊怒急攻之抱

玉出奇兵表裏夾擊殺傷甚眾董秦從思明寇河陽夜

帥其眾五百拔柵突圍降于光弼

帥讀曰率下同

時光弼自將

屯中潭城外置柵柵外穿塹深廣二丈

中河起石潭築城以衛河橋潭

蕩旱翻爾雅潭沙出深式禁翻廣古曠翻

乙巳賊將周摯捨南城併力攻中

渾光弼命荔非元禮出勁卒于羊馬城以拒賊

城外別築垣

高饒及肩謂之羊馬城

光弼自於城東北隅建小朱旗以望賊賊

恃其衆直進逼城以車載攻具自隨督衆填塹三面各八道以過兵又開柵為門光弼望賊逼城使問元禮曰

中丞視賊填塹開柵過兵晏然不動何也元禮曰司空

欲守乎戰乎光弼曰欲戰元禮曰欲戰則賊為吾填塹

為于偽翻下保為同

何為禁之光弼曰善吾所不及勉之

雖賞其敢戰而

戰危事也故曰勉之

元禮俟柵開帥敢死士突出擊賊却走數百

步元禮度賊陳堅未易摧陷

度徒洛翻
易弋豉翻

乃復引退

復扶
又翻

下擊
彼同

須其怠而擊之光弼望元禮退怒遣左右召欲斬

之元禮曰戰正急召何為乃退入柵中賊亦不敢逼良

久鼓譟出柵門奮擊破之周摯復收兵趣北城

趣七
俞翻

光

弼遽帥衆入北城登城望賊曰賊兵雖多囂而不整不

足畏也不過日中保為諸君破之乃命諸將出戰及期

不決召諸將問曰向來賊陳

陳讀
日陣

何方最堅曰西北隅

光弼命其將郝廷玉當之

廷玉光弼
之愛將也

廷玉請騎兵五百

與之三百又問其次堅者曰東南隅光弼命其將論惟

貞當之

論姓也諸論自吐蕃來降

惟貞請鐵騎三百與之二百光弼

令諸將曰爾曹望吾旗而戰吾颺旗緩任爾擇利而戰

吾急颺旗三至地

颺占翻

則萬衆齊入死生以之少退者

斬又以短刀置韉中

韉與靴同釋名曰韉本胡服趙武靈王所服實錄曰胡履也趙武靈

王好胡服常短鞬以黃皮為之後漸以長鞬軍戎通服唐馬周殺其鞬加以靴氍開元中裴叔通以羊為之隱麋加以帶子裴束故事邊番之服不許着入殿省至馬周加飾乃許之曰戰危事吾國之

三公不可死賊手萬一戰不利諸君前死於敵我自到

於此不令諸君獨死也諸將出戰頃之廷玉奔還光弼
望之驚曰廷玉退吾事危矣命左右取廷玉首廷玉曰
馬中箭非敢退也使者馳報光弼令易馬遣之僕固懷
恩及其子開府儀同三司瑒戰小却

瑒音暢又
雄杏翻

光弼又

命取其首懷恩父子顧見使者提刀馳來更前決戰光
弼連颺其旗諸將齊進致死呼聲動天地

呼火
故翻

賊衆大

潰

史言河陽之戰真為確鬪非李
光弼督諸將致死不足以決勝

斬首千餘級捕虜五

百人溺死者千餘人周摯以數騎遁去擒其大將徐瑁

玉李泰授其河南節度使安太清走保懷州

考異曰
舊傳斬萬

餘級生擒八千餘人擒其大將徐瑒玉李泰授周摯等
按李泰授上元元年四月乃見擒周摯二年三月為史
朝義所殺今從實錄實錄云擒偽懷州節度使安太清
并男朝俊偽貝州刺史徐瑒玉按太清上元元年九月
拔懷州始擒之今從舊傳予按通鑑書擒徐瑒玉李
泰授蓋從舊傳而以舊傳擒周摯為誤實錄所云擒安
太清朝俊通鑑皆不取而考異謂之今從實錄此四字
不可曉若參取二書又考本末則此時只當書擒徐瑒
玉如李泰授亦未當書擒思明不知摯敗尚攻南城光弼驅俘囚臨

河示之乃遁丁巳以李日越為石金吾大將軍 耶簡

嘉眉瀘戎等州蠻反

簡州漢牛鞞廣都之地後魏於牛
鞞置陽安縣及武康郡隋廢郡以

縣屬蜀郡仁壽初分置簡州餘

注見前邛渠容翻瀘龍都翻

十一月甲子以殿中

監董秦為陝西神策兩軍兵馬使

此殿中監所謂帶職以寄祿也

賜姓

李名忠臣 康楚元等衆至萬餘人商州刺史充荆襄

等道租庸使韋倫發兵討之駐於鄧之境招諭降者厚

撫之

降戶江翻

伺其稍怠進軍擊之生擒楚元其衆遂潰得

其所掠租庸二百萬緡荆襄皆平倫見素之從弟也

見章

素相天寶以迨至德從才用翻

發安西北庭兵屯陝以備史思明

第五琦作乾元錢重輪錢與開元錢三品竝行

重直龍翻民

爭盜鑄貨輕物重穀價騰踊餓殍相望上言者皆歸咎

於琦庚午貶琦忠州長史

忠州漢臨江墊江枳縣地梁置臨江郡後周置臨山至隋

廢郡及州以縣屬巴東郡唐初分置忠州地邊巴徼心懷忠信為名殍皮表翻上時兩翻長知兩翻忠州南賓

郡御史大夫賀蘭進明貶溱州員外司馬坐琦黨也

十二月甲午呂諲領度支使乙巳韋倫送康楚元詣

闕斬之史思明遣其將李歸仁將鐵騎五千寇陝州

神策兵馬使衛伯玉以數百騎擊破之於礪子阪得馬

六百匹歸仁走以伯玉為鎮西四鎮行營節度使李忠

臣與歸仁等戰于永寧莎柵之間屢破之

磴子阪在河南永寧縣西

永寧漢宜陽縣西界之地後周置同軌郡及熊耳縣嶠縣隋廢郡及嶠縣義寧元年改為永寧縣磴居良醜家白曰永寧縣本漢澠池縣之西境後魏大統十年於今縣東黃蘆城置北宜陽縣廢帝二年改為熊耳後周移於劉塢隋開皇三年移於同軌城義寧三年移於永固因倚堅舊城置縣以永寧為名武德三年移理同軌貞觀十四年移理莎柵十七年又移理鹿橋

上元元年

是年閏四月始改元

春正月辛巳以李光弼為太尉兼

中書令餘如故

丙戌以于闐王勝之弟曜同四鎮節

度副使權知本國事

于闐王與四鎮節度使皆在行營故令其弟與節度副使同權國事

党項等羗吞噬邊鄙將逼京畿乃分邠寧等州節度

為鄜坊丹延節度亦謂之渭北節度

邠寧節度領州九分四州為渭北節

度鄜音肅

以邠州刺史桑如珪領邠寧鄜州刺史杜冕領鄜

坊節度副使分道招討戊子以郭子儀領兩道節度使

兩道邠寧鄜坊也

留京師假其威名以鎮之

上祀九宮貴神

二月李光弼攻懷州史思明救之癸卯光弼逆戰於

沁水之上破之斬首三千餘級

沁七鳩翻

忠州長史第五

琦既行或告琦受人金二百兩遣御史劉期光追按之

琦曰琦備位宰相二百兩金不可手挈若付受有憑請

準律科罪期光即奏琦已服罪

史言劉期光不能奮克闕實而妄奏

庚戌

琦坐除名長流夷州

宋白曰夷州之地歷代恃險不聞臣附隋大業七年始招慰置綏陽

縣唐武德四年置夷州舊志京師南四千里三百八十七里至洛陽三千八百八十里

三月甲申

改蒲州為河中府 庚寅李光弼破安太清于懷州城

下夏四月壬辰破史思明于河陽西渚斬首千五百餘

級 襄州將張維瑾曹玠殺節度使史翺據州反

翺呼外副

制以隴州刺史韋倫為山南東道節度使時李輔國用事

節度使皆出其門倫既朝廷所除又不謁輔國尋改秦

州防禦使已未以陝西節度使來瑒為山南東道節度

使至德二載廢南陽節度使升襄陽防禦使為山南東道節度使領襄鄧隨唐安均房金商九州治襄州

瑒至襄州張維瑾等皆降降戶工翻閏月丁卯加河東節

度使王思禮為司空自武德以來思禮始不為宰相而

拜三公甲戌徙趙王係為越王己卯赦天下改元

改元上元追謚太公望為武成王選歷代名將為亞聖十

哲開元十九年始置太公尚父廟以留侯張良配中春中秋上戊祭之牲樂之制如文宣王出師命將發日

引辭于廟仍以古名將十人為十指配享是年尊為武
成王以歷代良將為十哲像坐侍秦武安君白起漢淮
陰侯韓信蜀丞相諸葛亮唐尚書右僕射衛國公李靖
司空英國公李勣列于左漢太子少傅張良齊大司馬
田穰苴吳將軍孫武魏西河守
吳起燕昌國君樂毅列於右
其中祀下祀并雜祀一

切並停

旱故也唐六典昊天上帝五方帝皇地祇神州
宗廟為大祀日月星辰社稷先代帝王岳鎮海

瀆帝社先蠶孔宣父齊太公諸太子廟為中祀司中司
命風師雨師眾星山林川澤五龍祠等及州縣社稷擇
真為小祀雜祀蓋小祀之神若
漢志所謂社將軍寶雞之類
是日史思明入東京

考異曰按去年九月思明已入東京實錄至此後云
爾者蓋當時城空李光弼在河陽思明還屯白馬寺不
入宮闕今始
移軍入城耳
五月丙午以太子太傅苗晉卿行侍中

晉卿練達吏事而謹身固位時人比之胡廣 宦者馬

上言受賂為人求官於兵部侍郎同中書門下三品呂諲

諲為之補官

為于偽翻

事覺上言杖死壬子諲罷為太子賓

客 癸丑以京兆尹南華劉晏為戶部侍郎充度支鑄

錢鹽鐵等使

南華本漢離狐縣歷代不更名大寶元年更名南華縣屬曹州鹽鐵使乾元元年以

命第五琦會要開元二十五年監察御史羅文信充諸道鑄錢使其後楊慎矜楊國忠相繼為之

晏善

治財利故用之

治直之翻

六月甲子桂州經略使邢濟奏

破西原蠻二十萬衆斬其帥黃乾曜等

西原蠻居廣容之南邕桂之西

有竊氏相承為豪又有黃氏居黃橙洞其屬也其地西接南詔天寶初黃氏疆與韋氏周氏儂氏相脣齒為寇害據十餘州人逐韋周于海濱縣地數十里帥所類翻

三品錢行寢久

開元錢與乾元

當十錢重輪錢為三品

屬歲荒米斗至七千錢人相食京兆尹鄭

叔清捕私鑄錢者數月間榜死者八百餘人不能禁

屬之

欲翻榜音彭

乃勅京畿開元錢與乾元小錢皆當十其重輪

錢當三十諸州更俟進止是時史思明亦鑄順天得一

錢

史思明鑄得一元寶錢徑一寸四分既而惡得一非長祚之兆改其文曰順天元寶

一當開元

錢百賊中物價尤貴

甲申興王侶薨侶張后長子也

幼曰定王侗

召音韶 侗音通 又音同

張后以故數欲危太子

數所角翻

太子常以恭遜取容會召薨侗尚幼太子位遂定 乙

酉鳳翔節度使崔光遠破党項于普潤

普潤縣屬鳳翔府漢杜陽縣之

地隋作仁壽宮大業初置普潤縣宋白曰普潤縣本漢安定鶉觚二縣之地在漢又為漆縣隋大業元年於細川谷置普潤縣蓋以杜漆岐三水灌溉民田民獲濟利以為縣名麟遊縣則漢杜陽之地有隋仁壽宮

平瀘兵馬使田神功奏破史思明之兵于鄭州 上皇

愛興慶宮自蜀歸即居之

事見上卷至德二載

上時自夾城往起

居

夾城開元二十年築 上皇亦間至大明宮

間古覓翻

左龍武大將軍

陳玄禮內侍監高力士久侍衛上皇上又命玉真公主

如仙媛

考異曰常侍言旨作九仙媛唐歷作九公主女媛今從新舊傳蓋舊宮人也

內侍王

承恩魏悅及梨園弟子常娛侍左右上皇多御長慶樓

長慶樓南臨大道上

皇每御之裴徊觀覽

父老過者往往瞻拜呼萬歲上皇

常於樓下置酒食賜之又嘗召將軍郭英乂等上樓賜

宴有劍南奏事官過樓下拜舞

諸道遣官入京師奏事者謂之奏事官

上

皇命玉真公主如仙媛為之作主人

偽太子

李輔國素微

賤雖暴貴用事上皇左右皆輕之輔國意恨且欲立奇

功以固其寵乃言於上曰上皇居興慶宮日與外人交通陳玄禮高力士謀不利於陛下今六軍將士盡靈武勲臣皆反仄不安臣曉諭不能解不敢不以聞

李輔國此言是

臨肅宗以兵也

上泣曰聖皇慈仁豈容有此

帝上上皇尊號曰聖皇天帝

對

曰上皇固無此意其如羣小何陛下為天下主當為社稷大計消亂於未萌豈得徇匹夫之孝且興慶宮與閭閻相參垣墉淺露非至尊所宜居大內深嚴奉迎居之與彼何殊又得杜絕小人熒惑聖聽如此上皇享萬歲

之安陛下有三朝之樂

記曰文王之為世子也朝於王季日三朝直遙翻

庸何

傷乎上不聽興慶宮先有馬三百匹輔國矯勅取之

勅矯

猶言矯詔也

纔留十匹上皇謂高力士曰吾兒為輔國所惑

不得終孝矣輔國又令六軍將士號哭叩頭請迎上皇

居西內

唐以大明宮為東內太極宮為西內興慶宮為南內號戶刀翻

上泣不應輔國

懼會上不豫秋七月丁未輔國矯稱上語迎上皇遊西

內至睿武門輔國將射生五百騎露刃遮道奏曰皇帝

以興慶宮秋隘

秋下也隘小也狹也陸德明音義秋子小翻徐音秋

迎上皇遷居

大內上皇驚幾墜

幾居依翻

高力士曰李輔國何得無禮叱

令下馬輔國不得已而下力士因宣上皇誥曰諸將士

各好在

以將士露刃遮道震驚上皇殊無善狀今其好在好在猶今人言好生言不得以兵干乘輿也

將士皆納刃再拜萬歲力士又叱輔國與已共執上皇

馬鞚侍衛如西內居甘露殿

西內以兩儀殿為內朝兩儀殿北有甘露門甘露門

內為甘露殿如往也

輔國帥眾而退

帥讀曰率下同

所留侍衛兵纔厖老

數十人

厖鳥尤翻

陳玄禮高力士及舊宮人皆不得留左右

上皇曰興慶宮吾之王地

王于况翻事見二百九卷睿宗景雲元年

吾數以

讓皇帝皇帝不受今日之徙亦吾志也是日輔國與六

軍大將素服見上請罪

北門六軍也數所
角翻見賢通翻

上又迫於諸

將乃勞之曰南宮西內亦復何殊

南宮即謂興慶宮取
語便順或言南內勞

力到翻復
扶入翻

卿等恐小人熒惑防微杜漸以安社稷何所

懼也刑部尚書顏真卿首率百寮上表請問上皇起居

輔國惡之奏貶蓬州長史

梁以漢宕渠縣界置安國縣
後周置蓬州隋廢州以縣屬

清化郡唐復分置蓬州惡烏路翻宋白曰因蓬山為名
至京師二千三百六十里東都二千五百八十二里

癸丑勅天下重稜錢皆當三十如畿內

重稜錢即重輪
錢重直龍圖

丙辰高力士流巫州王承恩流播州魏悅流秦州陳

玄禮勒致仕置如仙媛于歸州

貞觀八年分依州龍標縣置巫州京師南三千

一百五十八里至東都三十八百三十三里播州秦夜郎郡之南境隋牂柯郡之牂柯縣貞觀九年置郎州十

一年置播州京師南四千四百五十里至東都四千九

百六十里貞觀十六年開山洞置秦州至京師三千四

百八十里東都四千二百里歸州漢秭歸縣地後周置

秭歸郡隋廢郡以縣屬巴東郡唐武德二年分秭歸巴

東二縣置歸州京師南二千三百六

十八里至東都一千八百四十三里

真觀

玉真觀唐宗為主所起

上更選後宮百餘人置西內備灑掃

麗所賣翻掃素報翻人皆如字

令萬安咸宜二公主視服膳

萬安咸宜二公主皆

上皇女四方所獻珍異先薦上皇然上皇日以不懌因不

茹葷辟穀寢以成疾上初猶往問安既而上亦有疾但遣人起居其後上稍悔寤惡輔國欲誅之惡鳥路翻畏其握

兵竟猶豫不能決初哥舒翰破吐蕃于臨洮西關磨

環川於其地置神策軍

會要天寶十三載哥舒翰以前年收九曲請以其地置洮陽郡

郡內置神策軍去臨洮郡二百里

及安祿山反軍使成如璆

璆與球同

遣其

將衛伯玉將千人赴難

難乃旦翻

既而軍地淪入吐蕃伯玉

留屯於陝累官至右羽林大將軍八月庚午以伯玉為

神策軍節度使

為神策軍
強盛張本

丁亥贈謚興王侶曰恭懿

太子 九月甲午置南都於荊州以荊州為江陵府仍

置永平軍團練兵三千人以扼吳蜀之衝從節度使呂

諲之請也 或上言天下未平不宜置郭子儀於散地

散皆
亶翻

乙未命子儀出鎮邠州党項遁去

畏子
儀也

戊申制子

儀統諸道兵自朔方直取范陽還定河北發射生英武

等禁軍

射生號英武軍見上
卷至德二載十二月

及朔方廊坊邠寧涇原諸

道蕃漢兵共七萬人皆受子儀節度

廊音
夫

制下旬日復

為魚朝恩所沮事竟不行

使郭子儀果總兵向范陽則史思明有內顧之憂李光弼

成夾攻之勢必無邙山之敗矣郭李成功則又必無樹置河北諸帥之禍矣復扶又翻

冬十月

丙子置青沂等五州節度使

詳考通鑑所書乾元二年四月甲辰以尚衡為青密

節度使上元二年四月乙亥青密節度使尚衡破史朝義兵如此則是年尚衡尚鎮青密安得又置青沂等州節度使邪新書方鎮表上元二年置淄沂節度使領淄沂滄德棣五州侯希逸自平盧引兵保青州授青密節度使遂廢淄沂節度并所管五州疏淄青平盧節度通鑑書侯希逸為平盧淄青節度在寶應元年五月蓋新表與通鑑各以所見書為據故參錯不同如此

十一月壬辰涇州破党項

御史中丞李銑宋州刺史劉展皆領淮西節度副使銑

貪暴不法展剛彊自用故為其上者多惡之

惡烏路翻

節度

使王仲昇先奏銑罪而誅之時有謠言曰手執金刀起

東方仲昇使監軍使內左常侍邢延恩入奏

唐中人出監方鎮軍

品秩高者為監軍使其下為監軍監古銜翻

展僣僵不受命姓名應謠識

此句

當屬上句僣其勿翻彊其兩翻識謂金刀之謠應劉姓也

請除之延恩因說上曰展

與李銑一體之人今銑誅展不自安苟不去之恐其為

亂然展方握彊兵宜以計去之

說式內翻去羗呂翻

請除展江淮

都統代李恒

恒戶登翻

俟其釋兵赴鎮中道執之此一夫力

耳上從之以展為都統淮南東江南西浙西三道節度

使

考異曰沈既濟劉展亂紀云淮南東道浙江西道凡二十三州置都統節度下云以展為都統江南淮

南節度使下又云三道皆發吏申圖籍按舊李垺傳垺都統淮南江南江西節度展既代垺其所統亦三道耳淮南者東道揚楚滁和舒廬濠壽八州也江南者昇潤常蕪湖杭睦七州也江西者洪虔江吉袁信撫七州也凡二十二州亂紀誤以二

為三人脫江南西道字耳

密勅舊都統李垺及淮南東

李垺為浙東節度兼淮南見上卷元年按唐會要乾元元年十

二月李垺除都統淮南江東江西節度宣慰觀察處置等使都統之名起於此通鑑但書以浙東兼淮南與會

要少延恩以制書授展展疑之曰展自陳留參軍數年

至刺史可謂暴貴矣江淮租賦所出今之重任展無勲
勞又非親賢一旦恩命寵擢如此得非有讒人間之乎
間古
覓翻因泣下延恩懼曰公素有才望主上以江淮為憂

故不次用公公反以為疑何哉展曰事苟不欺印節可
先得乎延恩曰可乃馳詣廣陵與峘謀解峘印節以授
展展得印節乃上表謝恩牒追江淮親舊置之心膂三
道官屬遣使迎賀申圖籍相望於道展悉舉宋州兵七
千趣廣陵

趣七
喻翻

延恩知展已得其情還奔廣陵

書云作
偽心勞

日拙邪延
思之謂矣

與李峘鄧景山發兵拒之移檄州縣言展反

展亦移檄言峘反州縣莫知所從峘引兵度江與副使

潤州刺史韋儼

儼許緣翻

浙西節度使侯令儀屯京口鄧景

山將萬人屯徐城

徐城縣屬泗州漢徐縣地隋置徐城縣於大徐城開元三十五年移就臨

淮縣展素有威名御軍嚴整江淮人望風畏之展倍道先

期至使人問景山曰吾奉詔書赴鎮此何兵也景山不

應展使人呼於陳前曰

呼火故翻

汝曹皆吾民也勿干吾旗

鼓使其將孫待封張灋雷擊之景山衆潰與延恩奔壽

州展引兵入廣陵遣其將屈突孝標將兵三千徇濠楚

王暉將兵四千略淮西

暉古鄧翻

李岍闢北固為兵場

北固山在

京口梁武帝所登即其地

插木以塞江口展軍於白沙設疑兵於瓜

洲

今揚州江都縣南三十里有瓜洲鎮正對京口北固山寨昔則翻

多張火鼓

張火及鼓以為

疑兵若將趣北固者如是累日岍悉銳兵守京口以待之

展乃自上流濟襲下蜀

此自白沙濟江也昇州東北九十里至句容縣有下蜀戍在句

容縣北近江津

岍軍聞之自潰岍奔宣城

宣城漢宛陵縣地晉置宣城縣隋平陳廢

邵政宛陵為宣城縣帶宣州李岍奔宣城就鄭吳也

甲午展陷潤州

考異曰十一月壬子隹

南節度奏展反鄧景山李岷戰敗八日展陷潤州十日陷昇州按八日甲午十日丙申壬子二十六日乃奏到日也唐歷壬子淮南奏宋州刺史劉展赴鎮揚州長史淮南節度鄧景山都統尚書李岷承詔拒之兵敗奔于壽州乙未劉展陷揚州丙申陷潤州丁酉陷昇州壬子在前蓋因實錄也今從劉展亂紀及新書本紀

州軍士萬五千人謀應展攻金陵城

昇州治金陵

不克而遁

侯令儀懼以後事授兵馬使姜昌羣棄城走昌羣遣其

將宗犀詣展降丙申展陷昇州以宗犀為潤州司馬丹

楊軍使

乾元二年置丹楊軍于潤州

使昌羣領昇州以從子伯瑛佐

之從才用翻李光弼攻懷州百餘日乃拔之生擒安太清

考異曰舊傳云擒安太清周摯楊希文等送於闕下
按周摯於時不在懷州城中明年為史朝義所殺非尤
弼所擒也

史思明遣其將田承嗣將兵五千徇淮西王同

芝將兵三千人徇陳許敬江將二千人徇兗鄆薛鄂將

五千人徇曹州

新書江作
缸鄂作蓼

十二月丙子党項寇美原

同官大掠而去

後魏景明元年分漢富平縣置土門縣
屬新平郡因土門山為名隋廢土門縣

入華原咸亨二年分京兆之富平華原及同州之蒲城
以故土門縣置美原縣同官本漢銅官之地後因謂之
銅官川後魏真君七年置銅官縣屬北地郡隋為銅官
至唐二縣並屬京兆宋白曰同官縣漢役佃地晉為頻
陽地符堅於役佃城東北銅官川置銅官護軍
後魏真君七年罷軍為縣後周除全作此同字

賊帥

郭愔等引諸羌胡敗秦隴防禦使韋倫

帥所類翻殺監
敗補賈翻

殺監

軍使 充鄆節度使能元皓

方鎮表乾元二年升鄆齊
充三州都防禦使為節度

使是年以齊州隸青密而
充鄆增領徐州能奴代翻

擊史思明兵破之 李恒之

去潤州也副使李藏用謂恒曰處人尊位食人重祿臨

難而逃之非忠也

處昌呂翻
難乃旦翻

以數十州之兵食三江五

湖之險固

韋昭曰三江謂吳松江錢唐江浦陽江也吳
地記曰松江東北行七十里得三江口東北

入海為婁江東南入江為東江并松
江為三江五湖注已見晉安帝紀

不發一矢而棄之

非勇也失忠與勇何以事君藏用請收餘兵竭力以拒

之峘乃悉以後事授藏用藏用收散卒得七百人東至

蘓州募壯士得二千人立柵以拒劉展展遣其將傅子

昂宗犀攻宣州宣歙節度使鄭旻之棄城走

宣歙節度使領宣歙

饒三州歙書涉翻

李峘奔洪州李藏用與展將張景超孫待封

戰於郁墅兵敗奔杭州景超遂據蘇州待封進陷湖州

湖州本漢烏程縣地吳置吳興郡隋平陳廢郡置湖州大業初廢州以縣屬吳郡唐武德四年復置湖州

展

以其將許嶧為潤州刺史

嶧音亦

李可封為常州刺史楊

持璧蘓州刺史待封領湖州事景超進逼杭州藏用使

其將溫晁屯餘杭

餘杭漢縣時屬杭州在州西四十五里晁直遙翻

展以李晁

為泗州刺史宗犀為宣州刺史傅子昂屯南陵

南陵漢春穀縣

地梁置南陵縣及南陵郡隋廢郡以縣屬宣州舊治赭圻城長安四年移治青陽城

將下江州徇

江西

江西謂江南西道

於是屈突孝標陷濠楚州

屈居勿翻

王暉陷

舒和滁廬等州所向無不摧靡聚兵萬人騎三千橫行

江淮間壽州刺史崔昭發兵拒之由是暉不得西止屯

廬州初上命平廬兵馬使田神功將所部精兵三千屯

任城

任音壬

鄧景山既敗與邢延恩奏乞勅神功救淮南

未報景山遣人趣之

趣讀日促

且許以淮南金帛子女為賂

神功及所部皆喜悉衆南下及彭城神功討展

田神功至彭城

勅方下

展聞之始有懼色自廣陵將兵八千拒之選精兵

二千度淮擊神功於都梁山展敗走至天長

天寶元年分江都六

合高郵置千秋縣七載更名天長屬揚州

以五百騎據橋拒戰又敗展獨與

一騎亡度江神功入廣陵

考異曰劉展亂紀云二年春神功舉兵東下實錄唐勅

神功入揚州在此月今從之

及楚州

當屬上句蓋先入楚州而後入廣陵

大掠殺商胡


以千數城中地穿掘略徧

穿掘以求人所害藏者掘其月翻

是歲吐蕃

陷廓州

資治通鑑卷二百二十一



總校官庶吉士臣侍朝

校對官檢討臣龔大萬

謄錄監生臣甄輔廷

欽定四庫全書薈要

史部

資治通鑑卷二百二十二

詳校官編修臣汪鏞



欽定四庫全書薈要卷七千二百八

史部

資治通鑑卷二百二十二 宋 司馬光 撰

胡三省 音註

唐紀三十八

起重光赤奮若盡昭陽
單闕六月凡二年有奇

肅宗文明武德大聖大宣孝皇帝下之下

上元二年春正月癸卯史思明改元應天 張景超引

兵攻杭州敗李藏用將李彊於石夷門

敗補過翻將
即亮翻下同

孫

待封自武康南出

吳分烏程餘杭二縣置永安縣晉
改為永康又改為武康唐屬杭州將

會景超攻杭州

自武康南出過狗頭嶺至杭州五十里

溫晁據險擊敗之

去年李藏用使溫晁屯餘杭餘杭東至杭州錢塘縣界一十八里又東二十七里則至杭州此陸路也故溫晁

得趨而據險以敗孫待封

待封脫身奔烏程李可封以常州降丁未

田神功使特進楊惠元等將千五百人西擊王暉

暉戶登翻

辛亥夜神功先遣特進范知新等將四千人自白沙濟

西趣下蜀鄧景山將千人自海陵濟東趣常州

趣七喻翻下同

神功與邢延恩將三千人軍于瓜洲壬子濟江展將步

騎萬餘陳于蒜山

陳讀曰陣蒜山在潤州城西三里其上多蒜故名蒜蘓貫翻

神功

以舟載兵趣金山會大風五舟飄抵金山下

金山在大江中南直

西津渡口去潤州城七里

展屠其二舟沈其三舟

沈持林翻

神功不得度

還軍瓜洲而范知新等兵已至下蜀展擊之不勝弟殷

勸展引兵逃入海可延歲月展曰若事不濟何用多殺

人父子乎死早晚等耳遂更率衆力戰

帥讀日率

將軍賈隱

林射展中目而仆遂斬之

射而亦翻中竹仲翻日實錄云乙卯平盧兵馬使

考異

田神功生擒逆賊劉展舊神功傳亦然今從劉展亂紀

劉殷許嶧等皆死

嶧音亦

隱

林滑州人也楊惠元等擊破王晁于淮南晁引兵東走

至常熟乃降

王暉東走度江而至常熟晉分吳縣置海虞縣梁立信義郡南沙縣隋平陳廢郡并

海虞南沙海陽前京信義興國等縣為常熟縣屬蘇州

孫待封詣李藏用降張景

超聚兵至七千餘人聞展死悉以兵授張灋雷使攻杭

州景超逃入海灋雷至杭州李藏用擊破之餘黨皆平

平盧軍大掠十餘日

田神功所將平盧兵也

安史之亂亂兵不及

江淮至是其民始罹荼毒矣

考異曰劉展亂紀孫待封降以下事在二月今因

展敗終言之

荆南節度使呂誼奏請以江南之衡潭岳郴邵

永道連黔中之涪州皆隸荆南從之

邵州漢召陵都梁之地召陵後漢改

為昭陽晉改為邵陽吳立邵陵郡隋廢郡為邵陽縣屬
潭州唐武德四年分置南涿州貞觀十年更名邵州柳

丑林翻黔

二月奴刺党項寇寶雞

奴刺西羌種落之名刺來葛翻至德

其今翻

二載改陳倉縣為寶雞縣以其地有秦時寶雞祠故也時屬鳳翔府

燒大散關南侵鳳州

殺刺史蕭悅

悅余世翻

大掠而西鳳翔節度使李鼎追擊破

之戊辰新羅王金嶷入朝

嶷魚力翻

因請宿衛或言洛

中將士皆燕人

燕於肩翻

久戍思歸上下離心擊之可破也

陝州觀軍容使魚朝恩以為信然屢言於上上勅李光

弼等進取東京光弼奏稱賊鋒尚銳未可輕進朔方節

度使僕固懷恩勇而愎

愎蒲逼翻

麾下皆蕃漢勁卒恃功多

不法郭子儀寬厚曲容之每用兵臨敵倚以集事李光

弼性嚴一裁之以法無所假貸懷恩憚光弼而心惡之

乃附朝恩言東都可取

史言僕固懷恩欲覆李光弼之軍以便其私惡烏故翻朝直逆

翻由是中使相繼督光弼使出師光弼不得已使鄭陳

節度使李抱玉守河陽與懷恩將兵會朝恩及神策節

度使衛伯玉攻洛陽戊寅陳於邙山光弼命依險而陳

懷恩陳於平原光弼曰依險則可以進可以退若平原

戰而不利則盡矣思明不可忽也命移于險懷恩復止

之史思明乘其陳未定

陳讀日陣

進兵薄之官軍大敗死者

數千人軍資器械盡棄之

考異曰實錄云史思明潛遣間諜反說官軍曰洛中將

士久戍思歸士多不睦魚朝恩以為然乃告光弼及僕固懷恩衛伯玉等曰可速出軍以掃殘寇光弼等然之今從舊光弼傳實錄曰光弼懷恩敗績步兵死者數萬今從舊思明傳光弼懷恩度河走

保聞喜朝恩伯玉奔還陝抱玉亦奔河陽走河陽懷州

皆沒於賊朝廷聞之大懼益兵屯陝

相州之敗邙山之敗皆魚朝恩為之

也唐不以覆軍之罪罪朝恩而罷郭李兵柄失刑甚矣

李揆與呂諲同為相不

相悅

乾元二年李揆與呂諲同相上元元年諲罷

諲在荆南以善政聞揆恐

其復入相奏言置軍湖南非便

潭榔邵水道連皆在洞庭湖之南呂諲請兼領

之故揆言非其便復扶又翻

又陰使人如荆湖

荆謂荆南湖謂湖南

求諲過失

諲上疏訟揆罪癸未貶揆袁州長史以河中節度使蕭

華為中書侍郎同平章事史思明猜忍好殺

好呼到翻

羣

下小不如意動至族誅人不自保朝義其長子也

朝直遙翻

下朝清同長知兩翻

常從思明將兵頗謙謹愛士卒將士多附之

無寵於思明思明愛少子朝清使守范陽

朝清守范陽事始上卷上

年少詩
照翻

常欲殺朝義立朝清為太子左右頗泄其謀思

明既破李光弼欲乘勝西入關使朝義將兵為前鋒自

北道襲陝城思明自南道將大軍繼之

南道出二嶠之間漢建安中曹

公西討巴蜀惡南路之險更開北道

三月甲午朝義兵至礪子嶺

即礪子阪也按

舊書礪子嶺在陝城東

衛伯玉逆擊破之

考異曰實錄作甲子按長歷此月丙戌朔下

有戊戌當作甲午

朝義數進兵皆為陝兵所敗

數所角翻敗補邁翻

思明

退屯永寧以朝義為怯曰終不足成吾事欲按軍法斬

朝義及諸將戊戌命朝義築三隅城

新書作三角城蓋一角依山止築其

三角 欲貯軍糧

貯丁呂翻

期一日畢朝義築畢未泥思明至

詬怒之令左右立馬監泥斯須而畢

詬古侯翻監古街翻

思明又

曰俟克陝州終斬此賊朝義憂懼不知所為思明在鹿

橋驛

鹿橋驛永寧傳舍也貞觀十七年嘗徙永寧縣於此

令腹心曹將軍將兵宿

衛朝義宿于逆旅

水經注陝城東有漫澗澗北有逆旅亭謂之漫口客舍此鄴道元以一時

經由所見者言之耳自元魏至唐乾元上元間三百許年矣漫口客舍必不復存此逆旅特汎言旅舍耳其

部將駱悅蔡文景說朝義曰

說式芮翻

悅等與王死無日矣

自古有廢立請召曹將軍謀之朝義俛首不應

俛音免悅

等曰王苟不許悅等今歸李氏王亦不全矣朝義泣曰

諸君善為之勿驚聖人

當時臣子謂其君父為聖人

悅等乃令許叔

冀之子季常召曹將軍至則以其謀告之曹將軍知諸

將盡怨恐禍及已不敢違

令力丁翻將即亮翻

是夕悅等以朝義部

兵三百被甲詣驛

被皮義翻

宿衛兵怪之畏曹將軍不敢動

悅等引兵入至思明寢所值思明如廁問左右未及對

已殺數人左右指示之思明聞有變踰垣至廐中自韉

馬乘之

韉平秘翻

悅僉人周子俊射之

僉丁念翻射而亦翻

中臂墜馬

遂擒之

中竹仲翻

思明問亂者為誰悅曰奉懷王命

思明封朝義為

懷王

思明曰我朝來語失

謂欲斬朝義也

宜其及此然殺我太早

何不待我克長安今事不成矣悅等送思明于柳泉驛

囚之

唐制三十里一驛柳泉驛又當在鹿橋驛東三十里考異曰河洛春秋曰思明混諸嫡庶以少者

為尊惟愛所鍾即為繼嗣欲殺朝義追朝清為偽太子左右泄之父子之隙自此始構邠志曰三月思明乘勝欲下陝城使朝義帥銳卒北路先往已自宜陽引眾繼之今從實錄舊傳還報朝義曰事成

矣

還從宣翻朝直遙翻

朝義曰不驚聖人乎悅曰無時周摯許叔

冀將後軍在福昌

將即亮翻又音如字福昌又在柳泉驛之東宋白曰福昌縣唐屬洛州古

宜陽地今縣治
魏一泉塢城

悅等使許季常往告之摯驚倒于地朝

義引軍還摯叔冀來迎悅等勸朝義執摯殺之軍至柳

泉悅等恐衆心未壹遂縊殺思明

縊一計翻
又於賜翻

以氈裹其

尸橐駝負歸洛陽朝義即皇帝位改元顯聖密使人至

范陽勅散騎常侍張通儒等

散昔宣翻
騎奇計翻

殺朝清及朝清

母辛氏并不附已者數十人其黨自相攻擊戰城中數

月死者數千人范陽乃定

去年若果能使郭子儀自朔
方直搗范陽適值城中自相

攻擊可馳
檄而下也

朝義以其將柳城李懷仙為范陽尹燕京留

守

燕因肩翻守式又翻考異曰實錄曰朝義既殺思明密遣使馳至范陽殺偽太子朝英及偽皇后辛氏

并不附已者數十人偽范陽留守張通儒知有變遂引兵戰于城中數日戰不利死者數千人通儒被斬于亂兵中薊門紀亂曰思明既王有數十州之地年餘朝興遂為皇太子朝興辛氏之長男特為思明所愛嗜酒好色凶獷頑戾招集幽薊惡少與其年齒相類者百餘人為左右皆彎弓利劍飾以丹雘珠玉帶佩印雕鏤金銀控弦揮刃常如見敵以南行大將子弟統之每與其黨飲宴酒酣煖燎其鬚髮或以銅彈丸擊之以頤頤為的血流至地無楚痛之色則賞卮酒少似頻蹙乃鞭之從脛至踵或至數千困絕將殞方捨之俟稍愈復鞭之有杖六七千不死者姬妾皆思明所掠良家子有不稱命則殺之亦有以湯鑊死者既火盛湯沸令壯士抱而投之初宛轉叫呼頃臾骨肉糜爛旁人皆毛豎股慄朝興笑臨而觀之以所策毬杖于鑊中撞擊顏色自若上元

二年三月甲寅使使告捷云王師收績于洛北斬首萬餘級勒其六宮及朝興備車馬為赴洛之計賊庭之黨相慶踊躍叫喚聲振天地十餘日又宦者二人傳思明偽勅云收兵陝苑以朝興為周京留守仍勒馳驛速發并辛氏已下續行朝興大喜其宦者朝義偽遣之人莫知也時朝義已殺思明僭位潛勒偽左散騎常侍張通儒戶部尚書康孝忠與朝興衙將高鞠仁高如震等謀誅朝興其日朝興速召工匠與其母妻造寶鈿鞍勒搜索庫藏修乘騎之具并命左右各備行裝唯數十人侍衛思明留駿馬百餘匹在其廐中朝興出入馳驟每日則於桑乾河飲之通儒將入潛令康孝忠從數十人持兵詣飲處馳取其馬閉于城南毗沙門神之院通儒與鞠仁領步兵十餘人入其日華門為皇城留守劉象昌逢之驚問其故通儒顧左右斬之俄而朝興腹心衛鳴鶴人問亦斬之子城援亂朝興惶怖猶能掇甲持兵與親信二三十人出拒奔走于廐中取馬馬盡矣唯病馬

一匹朝興乘而策之不前遂步戰通儒立白旗招朝興之黨降者捨罪復官爵惡少等雖沐朝興之錫賚亦怨其無道鞭捶降者大半朝興猶從十餘人接戰弓矢所發無不中者中者皆應弦沒羽通儒軍披靡所傷者數十百人退出子城外人不知甲兵之故皆惶恐潛匿通儒于城門拒戰良久日已云暮朝興衆寡不敢走匿城上之逍遙樓遂失所在通儒兵入禁中劫掠金帛思明朝興妻衣服皆盡夜半蕃將曹閔之於樓上擒獲之朝興曰我兄弟六七人朝興一身斬之何益高如雲對曰以殿下殘酷人各有怨心朝興曰乞放此一度後更不敢執者皆笑又謂閔之曰此腰帶閔之自解取左右益笑奉將軍閔之曰殿下但死腰帶閔之自解取左右益笑縊以弓弦斷其首函送洛陽偽侍中向閔客特受思明委托朝興亦甚敬憚至是惶怖走入私第不自安旬旬待罪通儒頷之勒馳驛赴洛通儒收朝興黨與悉誅之思明號將辛萬年特有寵于朝興又與鞠仁如震等友

善為兄弟當誅朝興之黨也通儒有意于萬年及今行刑遂忘之至是勅鞠仁如震斬萬年首送鞠仁置酒與萬年同飲謂曰張尚書令殺弟故相報萬年稽首但乞快死鞠仁抗聲曰只可兄弟謀取通儒終不肯殺弟於是如震萬年領其部曲百餘人入子城斬通儒於子城南廊下城中擾亂又殺其素不快者軍將數人共推偽中書令阿史那承慶為留守函通儒等首使萬年送洛陽誣其欲以薊城歸順朝義聞之使使令向閨客所在却回為留守鞠仁如震等各從數百人被甲巡城城中人心彌懼承慶為留守一兩日又不自安遞相疑阻於是領蕃兵數十騎出于城至如震宅門立令屈將軍暫要相見如震不虞有難馳至馬前承慶斬之應聲而殞承慶入東軍與偽尚書康孝忠招集蕃羯鞠仁聞如震遇害驚而且怒統麾下軍討之相逢于宴設樓下接戰自午至酉鞠仁兵皆城旁少年驍勇勁捷馳射如飛承慶兵雖多不敵大敗殺傷甚衆積尸成丘承慶孝忠出

城收散卒東保潞縣又南掠屬縣野營月餘徑詣洛陽
自陳其事城中蕃軍家口盡踰城相繼而去鞠仁令城
中殺胡者皆重賞於是羯胡俱殫小兒皆擲于空中以
戈承之高鼻類胡而濫死者甚衆時鞠仁在城中最尊
使使奏朝義以承慶等反向閨客行至貝州承朝義命
廵將至衆官迎之鞠仁嚴兵不出閨客甚懼戒其子弟
從者無帶兵器從數人而入鞠仁待之於日華門閨客
望見下馬執手相慰鞠仁亦抗禮還營閨客但專守子
城端坐餘不敢輒有所問奏承慶等使廵朝義以鞠仁
為燕京都知兵馬使五月甲戌朔朝義以偽太常卿李
懷仙為御史大夫范陽節度使燕州頗有兵甲故委腹
心鞠仁聞之意不快也無何懷仙至從羸馬數千自薊
城南門入鞠仁不出迎之于日華門懷仙至卑身過禮
立談約為兄弟結盟相固期同保燕邦以獎其主鞠仁
意少解懷仙以薊縣為節度院雖任節制鞠仁兵五千
餘人皆不受命十數日懷仙待之彌厚每衙皆降階交

接鞠仁亦不為之屈既而懷仙命饗軍士中宴鞠仁疑有變兵皆驚走還營被甲懷仙憂懼無計遂囚其牙將朱希彩責以驚軍中之罪其夜鞠仁將襲懷仙遇大雨持疑未決徹明遂止單騎至節度門懷仙已潛備壯士待之鞠仁趨入懷仙亦不改常禮與坐良久乃問驚軍之罪門已閉顧左右拉殺之立捨希彩自暮春至夏中兩月間城中相攻殺凡四五死者數千戰鬪皆在坊市間巷間但兩敵相向不人人家家剽劫一物益家家自有軍人之故又百姓至于婦人小童皆閑習弓矢以此無虞六月丙申宣思明遣誥發喪將相百僚縞素哭于其聽政樓前卑幼相視而笑笑聲與哭聲參半焉朝義又追向閩客赴洛陽加懷仙燕京留守河洛春秋初朝義令人與向貢并阿史那王殺朝清朝清既受父命常有君臨之心惟以越獵為務車下勇敢之士僅三千人每日教習然其殘酷頗有父風而加姪亂幽州士庶無不吁嗟向貢高久仁等既見諸將之書又聞思明已死因

說朝清曰昨有密旨令大王主器承祧其事尤重今敵國猶在上人未還倘更移恩于人誠恐自貽窘迫朝清然之是日顧左右各令辭訣便自飭裝高久仁高如震等及其無備率壯士數百人潛入子城門阿史那王向貢等共率三百人繼至朝清時在卧内僕妾侍側忽聞兵士問是何人門人曰三軍叛乃擐甲登樓責讓向貢等高如震乃於樓下佯戰朝清自援弓射之凡斃數人阿史那軍佯北朝清下樓向貢等令人擒殺之向貢攝知軍事經四十日阿史那又殺向貢阿史那自稱長史三日後斬高久仁以其首梟之殺朝清故也高如震還固守與阿史那相持城中分兩軍經五日以燕州街為界各自禦備遞相捉搦不得往來阿史那從經略軍領諸蕃部落及漢兵三萬人至宴設樓前與如震會戰如震不利乃使輕兵二十人於子城東出直至經略軍南街腹背而擊之并招漢軍萬餘人阿史那軍敗走于武清縣界野營後朝義使招之盡歸東都應是胡面不憚

少長盡誅之於是朝義偽授李懷仙幽州節度高如震
旅拒之中承阿史那遁逸之後野行草次人各持兵糧
糧芻芟非戕不應朝義令兵士悉為商賈白衣先行至
幽州盡被捉為團練懷仙方自統五千餘騎直叩薊門
高如震方欲出師以抗其命慮其卒叛因出迎之懷仙
實內圖之且外示寬宥大行誘募咸捨厥愆於是士眾
帖然競皆欣戴乃大賞設經三日因眾前却乃斬高如
震幽州遂平舊傳亦云朝義令人殺偽太子朝英新傳
作朝清今從河洛春秋及新傳餘從薊門紀亂

時洛陽四面數百里州縣皆為

丘墟而朝義所部節度使皆安祿山舊將與思明等夷

朝義召之多不至

朝直遙翻使疏吏翻將即亮翻

略相羈縻而已不能

得其用 李光弼上表固求自貶

上時掌翻

制以開府儀同

三司侍中領河中節度使

術士長塞鎮將朱融

據新書長

塞鎮當在蔚州界唐制上鎮將正六品下中鎮將正七品上下鎮將正七品下

與左武衛將軍

竇如玠等

玠音彬

謀奉嗣岐王珍作亂金吾將軍邢濟告

之夏四月乙卯朔廢珍為庶人濤州安置其黨皆伏誅

嗣祥吏翻泰茲詵翻

珍業之子也

岐王業上皇之弟

丙辰左散騎常侍張

鎬貶辰州司戶鎬嘗買珍宅故也

散昔亶翻騎奇計翻鎬下老翻辰州盧溪

郡漢辰陽沅陵義陵縣地舊志辰州京師南微東三千四百五里

己未以吏部侍郎

裴遵慶為黃門侍郎同平章事

乙亥青密節度使尚

衡破史朝義兵斬首五千餘級 丁丑充鄆節度使能

元皓破史朝義兵

鄆音運 能奴代翻

壬午梓州刺史段子璋

反子璋驍勇從上皇在蜀有功

梓州梓潼郡漢郫縣廣漢氏道地驍堅亮翻

東川節度使李奐奏替之

替代也

子璋舉兵襲奐于綿州

綿州治巴西漢之涪縣也

道過遂州刺史虢王巨蒼黃修屬郡禮迎

之

梓遂二州並屬東川節度蓋列郡也巨修屬郡禮以迎子璋示卑服之意

子璋殺之李奐

戰敗奔成都子璋自稱梁王改元黃龍以綿州為龍安

府置百官又陷劔州

劔州治普安漢之梓潼縣也

五月己丑李光

弼自河中入朝 初李輔國與張后同謀遷上皇於西

內

遷上皇見上卷上年

是日端午山人李唐見上上方抱幼女謂

唐曰朕念之卿勿怪也對曰太上皇思見陛下計亦如陛下之念公主也上泫然泣下

泫胡猷翻

然畏張后尚不敢

詣西內 癸巳党項寇寶雞 初史思明以其博州刺

史令狐彰為滑鄭汴節度使將數千兵戍滑臺

滑州古滑臺也

彰密因中使楊萬定通表請降徙屯杏園度思明疑之遣其將薛岌圍之彰與岌戰大破之因隨萬定入朝甲

午以彰為滑衛等六州節度使

滑衛相貝
魏博六州

戊戌平盧

節度使侯希逸擊史朝義范陽兵破之 乙未西川節

度使崔光遠與東川節度使李奐共攻綿州庚子拔之

斬段子璋 復以李光弼為河南副元帥太尉兼侍中

都統河南淮南東西山南東荆南江南西浙江東西八

道行營節度

考異曰實錄舊紀皆云光弼都統河南
淮南山南東江東五道唐歷會要為河南

淮南東西山南東荆南五道劉展亂紀又有江西浙東
浙西凡八道按袁晁亂浙東光弼討平之則是浙東亦

其統內也今從之復扶又
翻帥所類翻統他綜翻

出鎮臨淮

臨淮郡
泗州

六月甲

寅青密節度使能元皓敗史朝義將李元遇

按上卷元年冬書究

鄆節度使能元皓詳考本末青密恐當作充鄆敗補賣翻

江淮都統李峘畏失守

之罪

失守事見上卷上年峘戶登翻

歸咎於浙西節度使侯令儀丙子

令儀坐除名長流康州

康州因晉康郡而名治端溪縣至京師五千七百五十里東都

五千一百五十里

加田神功開府儀同三司

賞平劉展之功也

徙徐州

刺史

自平廬兵馬使徙刺徐州

徵李峘鄧景山還京師

還從宣翻又音如字

戊寅党項寇好時

党底朗翻時音止好時縣自漢至後魏屬扶風後周省隋開皇十七年置

上宜縣屬京兆又有舊莫西縣十八年改曰好時大業三年廢入上宜武德二年分醴泉置好時貞觀八年廢

上宜入岐陽二十一年省好時
岐陽復置上宜更上宜曰好時

秋七月癸未朔日有

食之既大星皆見

見賢
通翻

以試少府監李藏用為浙西

節度副使

少詩
照翻

八月癸丑朔加開府儀同三司李輔

國兵部尚書乙未輔國赴上

僕射尚書赴省供職
日赴上上時掌翻

宰相

朝臣皆送之御厨具饌太常設樂輔國驕縱日甚求為

宰相上曰以卿之功何官不可為其如朝望未允何

相
息

亮翻
直遙翻

輔國乃諷僕射裴冕等使薦已上密謂蕭華曰

輔國求為宰相若公卿表來不得不與華出問冕曰初

無此事吾臂可斷

斷丁
管翻

宰相不可得華入言之上大悅

輔國衛之

街戶
絨翻

己巳李光弼赴河南行營 辛巳以

殿中監李若幽為鎮西北庭興平陳鄭等節度行營及

河中節度使

代李
光弼

鎮絳州賜名國貞

九月甲申天成

地平節

上於景雲二年九月三日生
以九月三日為天成地平節

上於三殿置道場

南部新書大明宮中有麟德殿在仙居殿之西北此殿三面亦以三殿為名雍錄麟德殿在翰林院之東以

宮人為佛菩薩

釋典曰菩普也薩濟也言能普濟衆生也

武士為金剛神王

范成大曰在處寺門有兩金剛神是千佛數中最後者一名婁至德一名青葉髻

召大臣膜拜圍

繞膜莫手翻

壬寅制去尊號但稱皇帝去年號但稱元年

去羌呂翻

以建子月為歲首月皆以所建為數因赦天下停

京兆河南太原鳳翔四京及江陵南都之號

四京見二百二十卷

至德元載南都見上卷上年

自今每除五品以上清望官及郎官御

史刺史令舉一人自代觀其所舉以行殿最

令力丁翻殿丁甸翻

江淮大饑人相食 冬十月江淮都統崔圓署李藏

用為楚州刺史

統他綜翻或從上聲 考異曰劉展亂紀曰初劉展既平諸將爭功時賞未及

李藏用崔圓乃署藏用為楚州刺史領二城而居盱眙
按實錄七月藏用已除浙西節度副使孟思命未到耳

會支度租庸使以劉展之亂諸州用倉庫物無準奏請

徵驗

唐六典度支郎掌支度國用租賦多少之數凡天下邊軍皆有支度之使以計軍資糧仗之用每歲

所費皆由度支而會計之此支度租庸使蓋使之支度江淮租庸者也使疏吏翻

時倉猝募兵物

多散亡徵之不足諸將往往賣產以償之藏用恐其及

已嘗與人言頗有悔恨其牙將高幹挾故怨使人詣廣

陵告藏用反先以兵襲之藏用走幹追斬之崔圓遂簿

責藏用將吏以驗之將吏畏皆附成其狀

將即亮翻附高幹之言以

成李藏用反狀

獨孫待封堅言不反圓命引出斬之或曰子何

不從衆以求生待封曰吾始從劉大夫奉詔書來赴鎮

劉大夫謂劉展赴鎮事見上卷上年

人謂吾反李公起兵滅劉大夫今又

以李公為反如此誰則非反者庸有極乎吾寧就死不

能誣人以非罪遂斬之

史言兵興之時多濫刑

建子月壬午朔

上受朝賀如正旦儀

以其月為歲首也朝直遙翻下同

或告鴻臚卿

康謙與史朝義通事連司農卿嚴莊俱下獄

臚陵如翻朝直遙翻

下遐嫁翻獄宜欲翻

京兆尹劉晏遣吏防守莊家上尋勅出莊引

見

見賢通翻

莊怨晏因言晏與臣言常道禁中語矜功怨上

丁亥貶晏通州刺史

通州通川郡漢宕渠縣地舊志通州京師西南二百五十里

莊

難江尉

難江縣漢宕渠地梁置東巴州後魏恭帝改集州後周改宕渠為難江縣以水為名也隋廢集

州以縣屬梁州唐初復置集州以難江為治所

謙伏誅戊子御史中丞元載為

戶部侍郎充句當度支鑄錢鹽鐵兼江淮轉運等使

古句

侯翻當丁浪翻度徙各翻使疏吏翻

載初為度支郎中敏悟善奏對上愛

其才委以江淮漕運數月遂代劉晏專掌財利

戊戌

冬至巳亥上朝上皇於西內

朝直遙翻下同

神策節度使衛

伯玉攻史朝義拔永寧破澠池福昌長水等縣

永寧池福昌

三縣時屬河南府通彌充翻後魏分陝縣置南陝縣西
魏改曰長淵屬弘農郡唐初改名長水避高祖諱也初
屬穀州後屬洛州宋白曰長水縣本盧氏地後魏延昌
二年分盧氏東境庫谷以西沙渠谷以東為南陝縣餘
同上

巳酉上朝獻太清宮庚戌享太廟元獻廟

太清宮在

丹鳳門之左南出第二坊太廟在朱雀街東第二
街北來第二坊元獻廟上母元獻楊后廟也建丑月

辛亥朔祀圓丘太一壇

乾元元年立太一壇見二百二十卷考異曰實錄建子月戊

成冬至其日祀昊天上帝已亥詔以來月一日祀圓丘
及太一壇又云建丑月辛亥以河南節度使來瑱為太
子少保下又有丁未巳酉庚戌日事又云建丑月辛亥
朔拜南郊祭太一壇按瑒傳未嘗為河南節度使及少
保實錄刺此一日事其冬至祀
上帝盖有司行事非親祀也

平盧節度使戾希逸

與范陽相攻連年救援既絕又為奚所侵乃悉舉其軍
二萬餘人襲李懷仙破之因引兵而南

寶應元年

以楚州表言上帝賜寶
王改元改元實在四月

建寅月

去年九月
以建子月為

歲首而通鑑仍以建寅月為歲首者以是年
四月制復月數皆如其舊也改元亦在是月

甲申追尊

靖德太子琮為奉天皇帝妃竇氏為恭應皇后丁酉葬

于齊陵

琮上皇之長子天寶十載薨謚曰靖德太子新
書地理志齊陵在京兆昭應縣東十六里琮祖

宗

甲辰吐蕃遣使請和

使疏
翻

李光弼拔許州擒史

朝義所署潁川太守李春朝義將史參救之

許州潁川郡
唐已復郡為

州安史猶仍天寶舊名
守式又翻將即亮翻

丙午戰于城下又破之 戊申

平盧節度使戾希逸於青州北度河而會田神功能元

皓於兗州

使疏吏翻
能奴代翻

租庸使元載以江淮雖經兵荒

其民比諸道猶有貨產乃按籍舉八年租調之違負及逋

逃者計其大數而徵之

八年自天寶十三載止上元二年天寶十三載天下未亂租調

之人為盛十四載而祿山反租調始有違負逋逃自是迄于去年大難未平戰兵不止違負逋逃年甚一年今不問有無計其大數而徵之調徒釣翻

擇豪吏為縣令而督之不問負之

有無貲之高下察民有粟帛者發徒圍之籍其所有而

中分之甚者什取八九謂之白著

著直略翻今人猶謂無故而費散財物者

為白著勃海高雲有白著歌曰上元官吏務剝削江淮之人多白著

有不服者嚴刑以威

之民有蓄穀十斛者則重足以待命

重直龍翻

或相聚山澤

為羣盜州縣不能制

建卯月辛亥朔赦下復以京

兆為上都河南為東都鳳翔為西都江陵為南都太原

為北都

去年罷四京及南都復扶又翻又如字

奴剌寇成固

成固縣自漢以來屬

漢中刺來達翻

初王思禮為河東節度使資儲豐衍贍軍之外

積米百萬斛奏請輸五十萬斛於京師思禮薨

乾元元年王思

禮鎮太原其
薨當在去年

管崇嗣代之為政寬弛信任左右數月間

耗散殆盡惟陳腐米萬餘斛在

言見在米止此數

上聞之以鄧

景山代之景山至則鉤校所出入將士輩多有隱沒皆

懼有裨將抵罪當死諸將請之不許其弟請代兄死亦

不許請入一馬以贖死乃許之諸將怒曰我輩曾不及

一馬乎遂作亂

將即亮翻

癸丑殺景山上以景山撫御失所

以致亂不復推究亂者遣使慰諭以安之

復扶又翻

諸將請

以都知兵馬使代州刺史辛雲京為節度使雲京奏張

光晟為代州刺史

張光晟有德於辛雲京見上卷乾元二年

絳州素無儲

蓄民間饑不可賦斂

斂力贍翻

將士糧賜不充朔方等諸道

行營都統李國貞屢以狀聞朝廷未報軍中咨怨

咨嗟憂愁

而怨上也突將王元振將作亂

突將以領驍勇馳突之士突將即亮翻

矯令於

衆曰來日修都統宅各具畚鍤

畚布充翻織竹為器鍤測洽翻鑿也

待命

于門士卒皆怒曰朔方健兒豈修宅夫邪乙丑元振帥

其徒作亂燒牙城門

帥讀曰率

國貞逃于獄元振執之置卒

食於前曰食此而役其力可乎國貞曰修宅則無之軍

食則屢奏而未報諸君所知也衆欲退元振曰今日之事何必更問都統不死則我輩死矣遂拔刃殺之鎮西北庭行營兵屯于翼城

翼城縣屬絳州本漢絳縣後魏曰北絳縣隋開皇十八年改曰

翼城以春秋翼侯邑於此也

亦殺節度使荔非元禮推裨將白孝德

為節度使朝廷因而授之戊辰淮西節度使王仲昇

與史朝義將謝欽讓戰于申州城下為賊所虜淮西震

駭會侯希逸田神功能元皓攻汴州朝義召欽讓兵救

之絳州諸軍剽掠不已

剽匹妙翻

朝廷憂其與太原亂軍

合從連賊

從子容翻

非新進諸將所能鎮服辛未以郭子儀

為汾陽王知朔方河中北庭潞澤節度行營兼興平定

國等軍副元帥發京師絹四萬匹布五萬端米六萬石

以給絳軍建辰月庚寅子儀將行時上不豫羣臣莫得

進見

見賢通翻

子儀請曰老臣受命將死於外不見陛下目

不瞑矣上召入卧内謂曰河東之事一以委卿史朝義

遣兵圍李抱玉於澤州子儀發定國軍救之乃去上

召山南東道節度使來瑱赴京師瑱樂在襄陽其將士

亦愛之乃諷所部將吏上表留之行及鄧州復令還鎮

樂音洛復
扶又翻

荆南節度使呂誣淮西節度使王仲昇及中

使往來者言瑱曲收衆心恐久難制上乃割商金均房

別置觀察使令瑱止領六州

山南東道領襄鄧隨唐安均房金商九州今分四州

餘五州耳曰領六州無亦於郢復二州增領一州邪

會謝欽讓圍王仲昇於申州

數月瑱怨之按兵不救仲昇竟敗沒行軍司馬裴茂謀

奪瑱位

茂如融翻

密表瑱倔彊難制

倔其勿翻
彊其兩翻

請以兵襲取

之上以為然癸巳以瑱為淮西河南十六州節度使

考

異曰舊傳無汝云
十五州今從實錄

外示寵任實欲圖之密勅以茂代填

為襄鄧等州防禦使 甲午奴刺寇梁州

刺來達翻

觀察使

李勉棄城走

時山南西道觀察使置司梁州

以邠州刺史河西臧希讓

為山南西道節度使

山南西道節度使領梁洋集壁文通巴興鳳利開渠達十三州邠彌頻

翻使疏吏翻 考異曰肅宗實錄作布衣代宗實錄有傳作希讓今從之

丙申党項寇奉

天

党底朗翻奉天縣屬雍州

李輔國以求宰相不得怨蕭華

求相不得

事見上上元二年八月相息亮翻

庚午以戶部侍郎元載為京兆尹載

詣輔國固辭輔國識其意壬寅以司農卿陶鉞為京兆

尹輔國言蕭華專權請罷其相上不許輔國固請不已

乃從之仍引元載代華

考異曰舊華傳云肅宗寢疾輔國矯命罷華相今從輔國傳

戊申華罷為禮部尚書以載同平章事領度支轉運使

如故

尚辰羊翻度徒洛翻

建巳月庚戌朔

建巳月四月也

澤州刺史李

抱玉破史朝義兵於城下

朝直送翻

士子楚州刺史崔旆

表稱有尼真如恍惚登天見上帝賜以寶玉十三枚

旆疏

珠翻恍呼廣翻尼女夷翻惚音忽唐會要十三寶一曰玄黃天符如笏長八寸闊三寸上圓下方近圓有孔黃玉也二曰玉雞毛文悉備白玉也三曰穀璧白玉也徑可五六寸其文粟粒無雕鐫之迹四曰西王母白環二

枚白玉也徑六七寸五曰碧色寶圓而有光六曰如意寶珠圓如雞卵光如月七曰紅韎羯大如巨栗赤如櫻

桃八曰琅玕珠二枚長一寸二分九曰玉块形如玉環四分缺一十曰玉印大如半手斜長理如鹿形陷入印中

以印物則鹿形著焉十一曰皇后採桑鉤長五六寸細如筋屈其末似金叉似銀十二曰雷公石斧長四寸闊二寸無孔細緻如青玉十三曰闕凡十云中國有災以三寶置于日中皆白氣連天旣所臻翻

此鎮之羣臣表賀 甲寅上皇崩于神龍殿

神龍殿蓋中宗於神

龍間居之年七十八乙卯遷坐于太極殿

坐徂卧翻神御坐也上

以寢疾發哀於內殿羣臣發哀於太極殿

內殿上居大明宮之寢殿

也太極殿西內前殿大行所御 蕃官務面割耳者四百餘人

務里翻丙辰

命苗晉卿攝冢宰上自仲春寢疾聞上皇登遐哀慕疾

轉劇乃命太子監國

冢而隴翻
監古衙翻

甲子制改元

改元
寶應

復以

建寅為正月月數皆如其舊

復扶
又翻

赦天下

初張后與

李輔國相表裏專權用事

見上卷乾
元二年

晚年更有隙內射

生使三原程元振黨於輔國

以宦官領射生手
故曰內射生使

上疾篤

后召太子謂曰李輔國久典禁兵制勅皆從之出擅逼

遷聖皇

玄宗尊號曰
聖皇天帝

其罪甚大所忌者吾與太子今主

上彌留

書顧命曰病日臻既彌留言病
日至一月愈留而不去體也

輔國陰與程元

振謀作亂不可不誅太子泣曰陛下疾甚危二人皆陛下勲舊之臣一旦不告而誅之必致震驚恐不能堪也

后曰然則太子姑歸吾更徐思之太子出后召越王係謂曰太子仁弱不能誅賊臣汝能之乎對曰能係乃命

內謁者監段恒俊選宦官有勇力者二百餘人授甲於

長生殿後

恒戶
登翻

乙丑后以上命召太子元振知其謀密

告輔國伏兵於陵霄門以俟之

雍錄六典大明宮圖宮城北面玄武門之西有

青霄門閣本大明宮圖作陵霄門

太子至以難告

雞乃
旦翻

太子曰必無是

事主上疾亟召我我豈可畏死而不赴乎元振曰社稷事

大太子必不可入乃以兵送太子於飛龍廐

飛龍廐伏內六開之

一也程大昌曰在玄武門外

且以甲卒守之是夜輔國元振勒兵三

殿收捕越王係段恒俊及知內侍省事朱光輝等百餘

人繫之以太子之命遷后于別殿時上在長生殿使者

逼后下殿并左右數十人幽于後宮宦官宮人皆驚駭

逃散丁卯上崩

年五十二

輔國等殺后并係及兇王儻

儻下殺翻

考異曰肅宗實錄曰張后因太子監國謀誅輔國其日使人以上命召太子語之太子不可乙丑后矯上命

將喚太子程元振知之密告輔國丙寅元振與輔國夜
勒兵於三殿前使人收捕越王及同謀內侍朱光輝段
恒俊等百餘人繫之移皇后于別殿其夜六宮內人中
官等驚駭奔走及明上崩代宗實錄曰乙丑皇后召上
既夜輔國元振勒兵捕係幽后丁卯肅宗崩係傳乙丑
后召太子丙寅夜元振輔國勒兵捕係幽后是日俱為
輔國所害舊肅宗紀丁卯宣遺詔是日上崩代宗紀乙
丑皇后矯詔召太子輔國元振衛從太子入飛龍殿以
俟變是夕勒兵於三殿收係及朱光輝馬英俊等丁卯
肅宗崩新本紀丙寅閑廐使李輔國飛龍殿副使程元
振遷皇后于別殿殺越王係究王倂是夜皇帝崩代宗
錄唐歷統紀係傳皆以段恒俊為馬英俊按張后以乙
丑日召太子迨夜不至時必知有變矣輔國等安能待
至來夜然後勒兵收係等乎蓋收係等在乙丑之夜也
今從代宗實錄舊代宗紀新舊傳皆云究王倂實應元
年薨而代宗實錄羣臣議係倂之罪云二王同惡共扇

姦謀蓋個亦預謀也今從之

是日輔國始引太子素服於九仙門與

宰相相見

閣本大明宮圖宮城西面右銀臺門之北有九仙門又北轉東則凌雲門相息亮翻叙

上皇晏駕拜哭

叙自上皇晏駕後宮中多故不見輔臣

始行監國之令

命太

子監國在甲子前而乙丑即有內變既定乃始行令監古咸翻

戊辰發大行皇帝喪於

兩儀殿宣遺詔

肅宗崩于東內寢殿發喪于西內內朝從上皇也上皇梓宮在西內前殿

已

已代宗即位

高力士遇赦還至朗州

上元元年高力士流巫州遇赦

還至朗州自朗至京師尚二十二百五十里赦者甲子赦也還從宣翻又音如字

聞上皇崩號

慟嘔血而卒

力士流見上卷上元元年號戶刀翻卒子恤翻

甲戌以皇子奉

節王适為天下兵馬元帥

奉節縣名蜀先主改魚復縣為奉節縣帥所類翻

李輔國恃功益橫明謂上曰大家但居禁中外事聽老

奴處分

於上前明言之無所忌憚橫戶孟翻處昌呂翻分扶問翻

上內不能平以其

方握禁兵外尊禮之乙亥號輔國為尚父而不名

齊太公輔

周武王號師尚父今以其號寵中人

事無大小皆咨之羣臣出入皆先詣

輔國亦晏然處之

史言李輔國凶愚處昌呂翻

以內飛龍廐副使程

元振為左監門衛將軍知內侍省事朱光輝及內常侍

啖庭瑤山人李唐等二十餘人皆流黔中

自朱光輝以下皆大行左

右監古街翻啖徒
覽翻默其今翻

初李國貞治軍嚴

治直之翻

朔方將士

不樂

樂音各

皆思郭子儀故王元振因之作亂子儀至軍

元振自以為功子儀曰汝臨賊境

絳州東與河南接界時賊又據河陽河內

故云然

輒害主將若賊乘其釁

釁隙也將即亮翻

無絳州矣吾為

宰相豈受一卒之私邪五月庚辰收元振及其同謀四

十人皆殺之

相息亮翻循士眾潛問罪人得害國貞者王元禮等

考異曰實錄云子儀至軍撫

四十人為首者斬餘並決殺邠志曰七月郭公到朔方行營舊傳曰三月子儀辭赴鎮汾陽家傳曰建辰月十一日發上都二十七日至絳州五月二日斬元振等三十人今元振名從諸書月日從家傳人數從實錄

雲京聞之亦推按殺鄧景山者數十人誅之由是河東

諸鎮率皆奉法

郭子儀誅王元振而河東諸鎮皆奉法
僕固懷恩分河北諸州授田承嗣等以

成藩鎮之禍用人可不謹哉

壬午以李輔國為司空兼中書令

党項寇同官華原 甲申以平盧節度使侯希逸為平

盧青淄等六州節度使

青淄齊沂密海六州淄州治淄川本漢琅陽縣宋僑立清河郡

及貝丘縣魏為東清河郡
隋置淄州取淄水為名

由是青州節度有平盧之號

乙酉徙奉節王适為魯王

适古活翻

追尊上母吳妃為

皇太后

吳妃事肅宗于東宮生上而薨

壬辰貶禮部尚書蕭華為峽

州司馬元載希李輔國意

輔國以不相銜華

以罪誣之也

勅

乾元大小錢皆一當一民始安之

民不便乾元三品錢見上卷乾元二年

史朝義自圍宋州數月城中食盡將陷刺史李岑不

知所為遂城果毅開封劉昌曰

易州有遂城府開封漢縣唐屬汴州漢故縣在

今縣南五十里杜佑曰大寶以後邊帥怙寵便請署官易州遂城府坊州安臺府別將果毅之類每一制則同

授十餘人倉中猶有麴數千斤請屑食之不過二十日李太

尉必救我

李太尉謂光弼

城東南隅最危昌請守之李光弼至

臨淮諸將以朝義兵尚彊請南保揚州光弼曰朝廷倚

我以為安危我復退縮朝廷何望

復扶又翻

且吾出其不意

賊安知吾之衆寡遂徑趣徐州

趣七喻翻

使兗鄆節度使田

神功進擊朝義大破之先是田神功既克劉展

去年正月神功

克劉展先悲薦翻下同

留連揚州未還太子賓客尚衡與左羽林

大將軍殷仲卿相攻于兗鄆

考異曰衡上元元年為淄青節度使此年五月田

神功自淄青移兗鄆六月衡自賓客為常侍七月仲卿自左羽林大將軍為光祿卿而得相攻于兗鄆者蓋衡猶未離淄青仲卿亦在彼雖聞光弼至憚其威名神功

有新除官皆未肯入朝也

遽還河南

此河南總言河南道

衡仲卿相繼入朝

考異曰舊傳云朝義來北邨

之勝寇申光等十三州自領精兵圍李岑于宋州將士
皆懼請南保揚州光弼徑赴徐州以鎮之遣田神功擊
敗之又曰初光弼將赴臨淮在道昇疾而行監軍使以
袁晁方擾江淮光弼兵少請保潤州以避其鋒光弼不
從徑往泗州光弼未至河南也田神功平劉展後逗留
于揚府尚衡殺仲卿相攻于兗鄆來填旅拒于襄陽及
光弼輕騎至徐州史朝義退走田神功遽歸河南尚衡
殺仲卿來填皆懼其威名相繼赴闕按光弼既使田神
功擊敗朝義則是神功已還也實錄今年八月袁晁始
陷台州借使當時已擾江淮則自泗州往潤州不得謂
避其鋒也今

務悉委判官張僂

僂七感翻
又倉含翻

僂吏事精敏區處如流

處昌

呂諸將白事光弼多令與僂議之諸將事僂如光弼由

是軍中肅然東夏以寧

夏戶推翻

先是田神功起偏裨為節

度使

去年六月田神功自平盧兵馬使節度充鄆

留前使判官劉位等於幕

府神功皆平受其拜及見光弼與倭抗禮乃大驚徧拜

位等曰神功出於行伍不知禮儀諸君亦胡為不言成

神功之過乎

史言武夫悍將可以禮化居其上者當以身作則行戶剛翻

丁酉赦

天下立皇子益昌王邈為鄭王

大寶改利州為益昌郡

延為慶

王迴為韓王來填聞徙淮西大懼上言淮西無糧請

俟收麥而行又諷將吏留已

來填拔眾以要君欲再求免得乎

上欲姑

息無事壬寅復以瑱為山南東道節度使

復扶又翻

飛龍副

使程元振謀奪李輔國權密言於上請稍加裁制六月已未解輔國行軍司馬及兵部尚書餘如故以元振代

判元帥行軍司馬仍遷輔國出居外第

自肅宗時李輔國常居禁中內

宅於是道路相賀輔國始懼上表遜位辛酉罷輔國兼

中書令進爵博陸王輔國入謝憤咽而言曰老奴事郎

君不了請歸地下事先帝上猶慰諭而遣之

考異曰舊傳輔國

欲入中書作謝表閣吏止之曰尚父罷相不應復入此門輔國氣憤而言曰老奴死罪事郎君不了請歸地下

事先帝上猶優詔答之按此乃對上之語非對閣吏之言也今從唐紀

士戍以兵部侍

郎嚴武為西川節度使襄鄧防禦使裴茂屯穀城穀城

漢筑陽縣地梁置義城郡及義城縣隋開皇十六年廢郡改縣曰穀城以其地有穀城山也既得密

勅即帥麾下二十人泐漢趣襄陽帥讀曰率趣七喻翻已已陳于

穀水北瑱以兵逆之問其所以來對曰尚書不受朝命

故來若受代謹當釋兵瑱曰吾已蒙恩復留鎮此復扶又翻

何受代之有因取勅及告身示之茂驚惑瑱與副使薛

南陽縱兵夾擊大破之追擒茂于申口金州洵陽縣有申口鎮送

京師賜死

考異曰舊戎傳云瑱設其于江津以俟之
茂初聲言假道入朝及見瑱即云奉代且欲

視事瑱報曰瑱已奉恩命復任此茂惶惑喻其麾下曰
此言必妄遂引射瑱軍因與瑱兵交戰茂軍大敗按瑱
若設具相見則茂豈得遽
射瑱軍而交戰今從瑱傳乙亥以通州刺史劉晏

去年十一月十一

月晏敗
通州

為戶部侍郎兼京兆尹充度支轉運鹽鐵鑄錢

等使

秋七月壬辰以郭子儀都知朔方河東北庭潞

儀澤沁陳鄭等節度行營

時以潞儀澤沁陳鄭為一鎮
以李抱玉為節度使蓋抱玉

先以陳鄭節度使討賊在行營李光弼印山之敗抱玉
奔澤州陳鄭為賊所隔朝廷因使之節度潞儀沁澤四

州

及興平等軍副元帥

癸巳劔南兵馬使徐知道反

以兵守要害拒嚴武武不得進 八月桂州刺史邢濟

討西原賊帥吳功曹等平之

帥所類翻

己未徐知道為其

將李忠厚所殺劒南悉平 乙丑山南東道節度使來

填入朝謝罪上優待之 己巳郭子儀自河東入朝時

程元振用事忌子儀功高任重數譖之於上子儀不自

安表請解副元帥節度使上慰撫之子儀遂留京師

台州賊帥袁晁攻陷浙東諸州改元寶勝

考異曰柳
璨正閏位歷

宋庠紀元通譜皆改
元并國今從新書

民疲于賦斂者多歸之李光弼遣

兵擊晃于衢州

衢州春秋時越姑蔑之地秦以為太末縣漢分立新安縣晉改信安唐置衢州

以三衢山名昔洪水派山為三道故曰三衢紋力瞻翻

破之

乙亥徙魯王适為

雍王

雍於用翻

九月庚辰以來瑱為兵部尚書同平章事

知山南東道節度使

乙未加程元振驃騎大將軍兼

內侍監

驃匹妙翻騎奇寄翻

左僕射裴冕為山陵使

方上之役唐置山陵

使以宰相為之議事有與程元振相違者丙申貶冕施州刺史

考異曰代宗實錄祕書監韓穎中書舍人劉烜善候星歷乾元中待詔翰林頗承恩顧又與李輔國昵狎時

上軫憂山陵廣詢卜兆穎等不能精慎妄有否臧因是得罪配流嶺南既行賜死于路初冕為僕射數論時政

遂兼御史大夫充山陵使以李輔國權重有恩乃奏輔國所親信劉烜為判官潛結輔國烜得罪乃連坐焉今從舊

程元振傳

上遣中使劉清潭使於回紇修舊好

好呼到翻

且徵

兵討史朝義清潭至其庭回紇登里可汗已為朝義所

誘云唐室繼有大喪今中原無主

因連有玄宗肅宗之喪遂誑以中原無主

可汗宜速來共收其府庫可汗信之清潭致勅書曰先

帝雖棄天下今上繼統乃昔日廣平王與葉護共收兩

京者也

事見二百二十卷至德二載

回紇業已起兵至三城

即朔方三受降

城見州縣皆為丘墟有輕唐之志乃困辱清潭清潭遣

使言狀且曰回紇舉國十萬衆至矣京師大駭上遣殿

中監藥子昂往勞之於忻州南初毗伽闕可汗為登里

求婚肅宗以僕固懷恩女妻之為登里可敦

勞力到翻為于為翻

妻七細翻

可汗請與懷恩相見懷恩時在汾州上令往見之

懷恩為可汗言唐家恩信不可負

為于為翻

可汗悅遣使上

表請助國討義可汗欲自蒲關入由沙苑出潼關東

向藥子昂說之曰關中數遭兵荒

說式為翻穀所角翻

州縣蕭條

無以供擬恐可汗失望賊兵盡在洛陽請自土門略邢

洛懷衛而南得其資財以充軍裝可汗不從又請自太

行南下據河陰扼賊咽喉

可從刊入聲汗音寒行戶剛翻咽音煙

亦不從

又請自陝州太陽津度河

陝州陝縣北有大陽關黃河津濟之要也即左傳秦孟明

伐晉自茅津濟封穀尸之路也亦曰陝津陝失舟翻

食太原倉粟與諸道俱進乃

從之

隋置太原倉在河東界史言回紇所利在中國財寶而不敢輕與賊遇

袁晁陷信

州

信州本吳郡陽郡之葛陽縣陳改葛陽為弋陽唐乾元元年分饒州之弋陽衢州之常山玉山及割建撫

之地置信州治上饒縣以其旁下饒州故以名縣是馳遥翻

冬十月袁晁陷溫州

明州

溫州永嘉郡治永嘉縣明州餘姚郡治鄞縣今之鄞縣是也

以雍王适為天

下兵馬元帥辛酉辭行以兼御史中丞藥子昂魏琚為

左右廂兵馬使以中書舍人韋少華為判官給事中李

進為行軍司馬會諸道節度使及回紇于陝州進討史

朝義

雍於用翻迨古活翻帥所類翻
少始照翻使疏吏翻朝直遙翻

上欲以郭子儀為

迨副程元振魚朝恩等沮之而止

呂且在

加朔方節度使

僕固懷恩同平章事兼絳州刺史領諸軍節度行營以

副迨

絳州絳郡時朔方軍屯絳州故以懷恩領刺史為懷恩恃功畔援張本

上在東宮

以李輔國專橫心甚不平

孟橫下

及嗣位以輔國有殺張

后之功不欲顯誅之士戌夜盜入其第竊輔國之首及

一臂而去

考異曰舊傳云盜殺李輔國携首臂而去統紀曰輔國悖于明皇上在東宮聞而頗怒

及踐阼輔國又立功難于顯戮密令人刺之斷其首棄之園中又斷其右臂馳祭泰陵中外莫測後杭州刺史杜濟話於人曰嘗識一武人為牙門將曰某即害尚父者今從舊傳勅有司捕盜遣中使

存問其家為刻木首葬之

為于偽翻

仍贈太傅

太傅三公

丙寅

上命僕固懷恩與母妻俱詣行營

時登里與懷恩之女俱來故使懷恩母妻

詣行營以親結之

雍王适至陝州回紇可汗屯於河北

雍於用翻适古

活翻陝失冉翻紇下沒翻可從刊入聲汗音寒陝州之河北也括地志曰陝州河北縣本漢大陽縣天寶元年

太守李齊物開三門以利漕運得古
刃有篆文曰平陸因更名平陸縣

适與僚屬從數十

騎往見之可汗責适不拜舞藥子昂對以禮不當然回

紇將軍車鼻曰唐天子與可汗約為兄弟可汗於雍王

叔父也何得不拜舞子昂曰雍王天子長子今為元帥

騎奇寄翻長知
兩翻帥所類翻

安有中國儲君向外國可汗拜舞乎且

兩宮在殯

兩宮謂上皇先
帝時皆未葬

不應舞蹈力爭久之車鼻遂

引子昂魏琚韋少華李進各鞭一百以适年少未諳事

遣歸營

應於陵翻少詩照翻諳烏含翻
實錄云雍王恭行詔命辭色不屈

考異曰代宗
虜亦不敢失

禮時人難之時官軍合圍將誅無禮王以東略之故止之又曰會中數萬人駭愕失色雍王正色叱之可汗遂退建中實錄曰上堅立不屈此蓋史官虛美耳今從舊回紇傳

据少華一夕而死戊辰

諸軍發陝州僕固懷恩與回紇左殺為前鋒陝西節度

使郭英乂

方鎮表上元元年改陝號華節度為陝西節度使使疏吏翻

神策觀軍容

使魚朝恩為殿

殿丁練翻

自澠池入

澠彌充翻

潞澤節度使李抱

玉自河陽入河南等道副元帥李光弼自陳留入

分道並入

以攻雍王留陝州

考異曰代宗實錄戊辰元帥雍王帥僕固懷恩等諸軍及回紇兵馬進

發陝州東討留英乂朝恩為後殿是日又詔河東道節度使自澤州路入今從唐歷及舊朝義傳

辛未

懷恩等軍于同軌

河南永寧縣後周之同軌縣地有同軌城

史朝義聞官軍

將至謀於諸將阿史那承慶曰唐若獨與漢兵來宜悉

衆與戰若與回紇俱來其鋒不可當宜退守河陽以避

之朝義不從

朝直遙翻諸將即亮翻紇下沒翻

壬申官軍至洛陽北郊

分兵取懷州癸酉拔之

去年印山之敗河陽懷州皆陷于賊洛陽北郊在印山外乙

亥官軍陳于橫水

按舊書橫水在洛陽北郊金人疆域圖孟津縣有橫水店陳讀曰陣下恩

陳陳於賊陳陳亦同

賊衆數萬立柵自固懷恩陳于西原以當之

遣驍騎及回紇並南山出柵東北

驍堅堯翻騎奇計翻並步浪翻柵測革翻

表裏合擊大破之朝義悉其精兵十萬救之陳於昭覺

寺官軍驟擊之殺傷甚衆而賊陳不動魚朝恩遣射生

五百人力戰賊雖多死者陳亦如初鎮西節度使馬璘

曰事急矣犯陳而不能陷引退必敗故遂單騎奮擊奪

賊兩牌牌古謂之楯晉宋之間謂之彭排南方以皮編竹為之以捍敵北人以木為之左傳樂祁以揚

楯賈禍蓋北方之用木也尚矣突入萬衆中賊左右披靡披普彼翻大軍乘

之而入賊衆大敗轉戰於石榴園老君廟賊又敗人馬

相蹂踐填尚書谷蹂人九翻尚辰羊翻斬首六萬級捕虜二萬人朝

義將輕騎數百東走

將即亮翻又音如字下等將同

懷恩進克東京及

河陽城獲其中書令許叔冀王佑等

佑音曹

承制釋之懷

恩留回紇可汗營于河陽使其子右廂兵馬使瑒及朔

方兵馬使高輔成帥步騎萬餘乘勝逐朝義

紇下沒翻可從刊入

聲汗音寒使疏吏翻瑒音暢又雄杏翻帥讀曰率下同騎奇計翻朝直遙翻

至鄭州再戰皆

捷朝義至汴州其陳留節度使張獻誠閉門拒之朝義

奔濮州獻誠開門出降

汴皮面翻濮博木翻降戶剛翻下同

回紇入東京

肆行殺略死者萬計火累旬不滅朔方神策軍亦以東

京鄭汴汝州皆為賊境所過虜掠三月乃已

使郭李為帥安有是

禍比屋蕩盡士民皆衣紙

比毗必翻又毗至翻衣於既翻

回紇悉置所

掠寶貨於河陽留其將安恪守之十一月丁丑露布至

京師朝義自濮州北度河懷恩進攻滑州拔之追敗朝

義於衛州

將即亮翻敗補賣翻

朝義睢陽節度使田承嗣等將兵

四萬餘人與朝義合復來拒戰

睢音雖嗣祥吏翻復扶又翻

僕固瑒

擊破之長驅至昌樂東朝義帥魏州兵來戰又敗走

昌樂

漢古縣屬魏州後唐避諱改為南樂樂音洛帥讀曰率

於是鄴郡節度使薛嵩以

相衛洺邢四州降于陳鄭澤潞節度使李抱玉恒陽節度使張忠志以趙恒深定易五州降于河東節度使辛

雲京

洺音名恒戶登翻
衛洺邢趙州降于李抱玉李寶臣以深恒定易四

考異曰舊懷恩傳云嵩以相

州降于雲京代宗實錄曰張忠志以趙恒深恒易五州
歸順又曰史思明授忠志恒趙節度使今從舊王武俊

傳

嵩楚玉之子也

楚玉薛
訥之弟

抱玉等已進軍入其營按其

部伍嵩等皆受代居無何僕固懷恩皆令復位由是抱

玉雲京疑懷恩有貳心各表言之朝廷密為之備懷恩

亦上疏自理上慰勉之

令力丁翻朝直遙翻
上時掌翻疏所去翻

辛巳制東

京及河南北受偽官者一切不問

為青冀魏幽各據所有州縣以傳世張本

己丑以戶部侍郎劉晏兼河南道水陸轉運都使

宗睿

先天二年以李傑為陝州刺史充水陸運使水陸運使自此始也至開元二年間以傑除河南少尹充水陸運使大寶十二載陝郡太守崔無諛充使楊國忠充使水陸轉運都使始此

丁酉以張忠志

為成德軍節度使統恒趙深定易五州賜姓李名寶臣初辛雲京引兵將出井陘常山裨將王武俊說寶臣曰今河東兵精銳出境遠鬪不可敵也且吾以寡當衆以曲遇直戰則必離守則必潰公其圖之寶臣乃撤守備

舉五州來降及復為節度使以武俊之策為善

說武為
翻復扶

又

擢為先鋒兵馬使武俊本契丹也初名沒諾干

為王
武俊

夷張氏得成德張本
契欺訖翻又音喫

郭子儀以僕固懷恩有平河朔功

請以副元帥讓之己亥以懷恩為河北副元帥加左僕

射兼中書令單于鎮北大都護朔方節度使史朝義走

至貝州與其大將薛忠義等兩節度合僕固瑒追之至

臨清

臨清漢清淵縣後漢改曰臨清唐屬
貝州九域志在魏州北一百五十里

朝義自衡水

引兵三萬還攻之瑒設伏擊走之回紇又至官軍益振

遂逐之大戰于下博東南

下博漢縣時屬深州

賊大敗積尸擁流

而下朝義奔莫州

考異曰河洛春秋曰朝義戰敗走歸范陽途經衡水僕固瑒領蕃漢兵

一十五萬追及朝義接戰敗之是夏涉秋苦雨陂湖流注河東兵馬使李喝誠成德軍將李令崇成統精兵亦單面來王兢為犄角其漳河及諸津渡船悉是虜獲朝義遣人致命竟不應續令散雇舟船並皆掠盡四路俱絕諸將或請戰或請降朝義不悅田承嗣上疏與朝義曰臣聞兵勢兩均成敗由將衆寡不敵全滅在權昔劉主破于白帝曹公敗于赤壁陸遜黃蓋皆以權道取之今部統之師皆自疲頓主客勢倍勞逸力殊若驅而今戰未見其利請用車五十來於古憂康王城北作三箇車營車上皆設柵排倒戈為禦每車甲士二人持兵而伏隨軍子女羅於帳中每營輜重分列其次營後選二萬人布偃月陣凡敵衆我寡則設此陣左右有險亦設

此陣左右奇軍亦設此陣各令猛將主之左者東南行
右者西南行令去車營十里餘營前選精卒五十人雁
行陣使之接戰不勝則退於偃月陣後前軍既却敵必
至車營愛其珍玩必將攻取候其兵縱陣勢已分然後
桴鼓齊鳴前後俱至貔貅奮勇鹵楯爭先左軍西行右
軍東邁皆取古城之南令首尾相屬伏兵之發料敵必
驚後軍之來自然斷絕前後既不相救中軍又遇精兵
服色相亂不敗何待令文景義主左軍達干義感主右
軍足下自主中軍若其不捷老臣請以弱卒五千為足
下吞之朝義覽疏大悅因用其計官軍敗績喪師三千
餘級僕固場大震退師數十里由是朝義得達莫州朝
義既敗官軍威聲復振凡所追集人莫已違鳩集舟舫
并連牌檣先濟輜重兼及老弱方以軍南行若有攻擊
僕固場令吏士各顧所部以抗其鋒朝義乃整師徒一
時北濟僕固場亦連船艦懷恩都知兵馬使薛蕪訓兵
宵濟赴之今從舊懷恩傳

馬使郝庭玉與田神功辛雲京會於下博進圍朝義于

莫州青淄節度使侯希逸繼至 十二月庚申初以太

祖配天地

高祖武德元年制每歲圓丘方丘之祀以太祖景皇帝配高宗乾封二年以高祖太宗並

配是時太常卿杜鴻漸等議以神堯為受命之主非始封之君不得為太祖以配天地太祖景皇帝始受封于唐即殷之契周之后稷也請以郊配天地從之

代宗睿文孝武皇帝上之上

初名叡後改名豫肅宗長子也登遐之後議上廟號曰世宗避太宗諱改曰代宗

廣德元年

是年七月方改元事見下卷

春正月己卯追謚吳太后曰

章敬皇后

吳太后上生母也

癸未以國子祭酒劉晏為吏部

尚書同平章事度支等使如故 初來瑱在襄陽程元

振有所請託不從及為相

去年加來瑱同平章事

元振諧瑱言涉

不順王仲昇在賊中以屈服得全賊平得歸與元振善

奏瑱與賊合謀致仲昇陷賊壬寅瑱坐削官爵流播州

賜死于路由是藩鎮皆切齒於元振

為諸鎮忌程元振不敢勤王張本

史朝義屢出戰皆敗田承嗣說朝義令親往幽州發

兵還救莫州承嗣自請留守莫州

說式為翻守式又翻

朝義從之

選精騎五千自北門犯圍而出朝義既去承嗣即以城

降送朝義母妻子於官軍於是僕固瑒戾希逸薛兼訓

等帥衆三萬追之及於歸義

歸義漢易縣地屬涿郡北齊省入鄭縣武德五年置

歸義及北義州貞觀元年州縣皆省八年復置歸義與

縣屬幽州按宋白續通典唐歸義縣在瓦橋關北

戰朝義敗走時朝義范陽節度使李懷仙已因中使駱

奉仙請降遣兵馬使李抱忠將兵三千鎮范陽縣

范陽縣漢

涿縣也為涿郡治所曹魏文帝改涿郡為范陽郡隋廢范陽郡復置涿郡於薊縣以涿縣屬焉武德七年改涿縣為范陽縣仍屬幽州天寶元年改幽州涿郡為范陽郡故薊城亦曰范陽史以縣字別之其地在薊南宋白

日南至莫州
一百六十里

朝義至范陽不得入官軍將至朝義遣人

諭抱忠以大軍留莫州輕騎來發兵救援之意因責以

君臣之義抱忠對曰天不祚燕唐室復興

復扶又翻

今既歸

唐矣豈可更為反覆獨不愧三軍邪大丈夫恥以詭計

相圖願早擇去就以謀自全且田承嗣必已叛矣不然

官軍何以得至此朝義大懼曰吾朝來未食獨不能以

一餐相餉乎抱忠乃令人設食于城東於是范陽人在

朝義麾下者並拜辭而去朝義涕泣而已獨與胡騎數

百既食而去東奔廣陽

餉式亮翻令力丁翻朝直遙翻騎奇計翻檀州燕樂縣後魏置

廣陽郡後齊廢郡而舊郡名猶存

廣陽不受欲北入奚契丹至溫泉柵

據新舊書懷恩傳溫泉柵在平州界石城縣東北契欺訖翻又音喫柵測革翻

李懷仙遣兵追

及之朝義窮蹙縊于林中懷仙取其首以獻僕固懷恩

與諸軍皆還甲辰朝義首至京師

縊於賜翻又於計翻還音旋又如字考

異曰河洛春秋曰朝義東投廣陽郡不受北取路縣漁陽擬投兩蕃至榆關李懷仙使使招回却至漁陽過從路縣至幽州城東阿婆門外於平閭神廟中兄弟同被絞縊而死乃授首與駱奉仙經一日諸軍方知歸莫州城下舊僕固懷恩傳曰寶應二年三月朝義至平州石城縣溫泉柵窮蹙走入長林自縊懷仙使妻弟徐有濟

傳其首以獻史朝義傳二年正月李懷仙於莫州生擒之送款來降梟首至闕下實錄寶應元年十一月己亥僕固懷恩上言幽州平河北州縣盡平史朝義為亂兵所戮傳首上都舊紀寶應二年十月河北州郡悉平李懷仙以幽州降田承嗣以魏州降沈既濟建中實錄二年正月賊將李懷仙擒朝義以降山東平唐歷正月甲辰李懷仙擒史朝義梟首獻至闕下盡以所管來降年代記寶應元年十二月己亥僕固懷恩上言史朝義為亂兵所殺傳首上都二年正月甲申朝義自殺其將李懷仙以幽州紀廣德元年正月甲申朝義自殺其將李懷仙以幽州降按諸軍圍朝義于莫州已在去年十一月末而河洛春秋云圍城四十日懷恩舊傳亦云攻守月餘日然則朝義之死必在今年正月明矣諸書皆云朝義此年正月被殺而實錄在元年十一月舊紀因之又脫十一月字懷恩傳誤以正月為三月甲申正月十日甲辰三十日也新本紀蓋據年代記但年代記元年冬十一月己

亥朝義死亦與實錄同若正月被殺不應十月首級已至長安疑甲申自殺甲辰傳首至闕新紀正用年代記甲申至闕為自殺日未知何所據今從唐歷以甲辰傳首至京師

閏月己酉夜有回

紇十五人犯含光門突入鴻臚寺

紇下沒翻唐太極宮南面三門中曰朱雀

門東曰安上門西曰含光門按朱雀門太極宮端門也雍錄曰承天門之南朱雀門之北宗廟社稷百僚廨舍列乎其間六省九寺一臺兩監十八衛以坊里準之此兩門內外南北各占兩坊不為民居自朱雀門南即市井邑屋各立坊巷以此觀之則朱雀街西兩坊百司庶府居之其門曰含光門朱雀街東兩坊亦百司庶府居之其門曰安上門也臚陵如翻門司不敢過 癸亥以史朝義降將薛

嵩為相衛邢洺貝磁六州節度使

宋白曰磁州本漢廣平縣地周武帝於此

置滏陽縣及成安郡隋開皇十年廢郡置磁州唐武德元年分相州置磁州貞觀元年州廢薛嵩既得節復表以相州之滏陽洺州之邯鄲武安置磁州磁墻之翻相息亮翻

田承嗣為魏博德滄瀛

五州都防禦使

魏州漢魏郡之地博州漢為東郡聊城縣德州漢平原郡地隋置德州因安德

縣名

李懷仙仍故地為幽州盧龍節度使

改范陽節度使為幽州節

度使時平盧已陷又兼盧龍節度使

時河北諸州皆已降嵩等迎僕固懷

恩拜於馬首乞行間自効

降戶江翻行戶剛翻

懷恩亦恐賊平寵

衰故奏留嵩等及李寶臣分帥河北自為黨援

帥所類翻下同

朝廷亦厭苦兵革苟冀無事因而授之

河北藩鎮自此彊傲不可制矣

回紇登里可汗歸國其部衆所過抄掠

紇下沒翻可從刊入聲汗

音寒抄楚交翻

廩給小不如意輒殺人無所忌憚陳鄭澤潞節

度使李抱玉欲遣官屬置頓人人辭憚

使疏吏翻

趙城尉馬

燧獨請行

隋義寧元年分霍邑置趙城縣屬晉州

比回紇將至

比必利燧翻及也

先遣人賂其渠帥約毋暴掠

帥所類翻下同

帥遺之旗曰

遺惟李翻

有犯令者君自戮之燧取死因為左右小有違令立斬

之回紇相顧失色涉其境者皆拱手遵約束抱玉奇之

燧因說抱玉曰燧與回紇言頗得其情僕固懷恩恃功

驕蹇其子場好勇而輕

說式為翻好呼到翻場音暢又雄杏翻輕區正翻

今內

樹四帥

四帥謂田承嗣李寶臣李懷仙薛嵩

外交回紇必有窺河東澤潞

之志宜深備之抱玉然之

初長安人梁崇義以羽林

射生從來瑱鎮襄陽累遷右兵馬使崇義有勇力能卷

鐵舒鉤沈毅寡言

瑱他旬翻卷讀日捲沈持林翻

得衆心瑱之入朝也

命諸將分戍諸州

朝直遙翻將即亮翻

瑱死戍者皆奔歸襄陽行

軍司馬龐充將兵二千赴河南

蓋先是來瑱使龐充赴河南行營會討史朝義

至汝州聞瑱死引兵還襲襄州左兵馬使李昭拒之充

奔房州崇義自鄧州引戍兵歸與昭及副使薛南陽相

讓為長

長知兩翻

久之不決衆皆曰兵非梁卿主之不可遂

推崇義為帥崇義尋殺昭及南陽以其狀聞上不能討

三月甲辰以崇義為襄州刺史山南東道節度留後

唐藩

鎮命帥未授旌節者先以為節度留後為梁崇義以襄陽拒命而死張本

崇義奏改葬瑱為

之立祠不居瑱聽事及正堂

為于偽翻聽讀曰廳

辛酉葬至道

大聖大明孝皇帝于泰陵

泰陵在同州奉先縣東北二十里金粟山

廟號玄

宗庚午葬文明武德大聖大宣孝皇帝于建陵

建陵在京兆醴

泉縣東北十里武將山廟號肅宗夏四月庚辰李光弼奏擒袁

晁浙東皆平時晁聚衆近二十萬

近其新翻

轉攻州縣光弼

使部將張伯儀將兵討平之伯儀魏州人也郭子儀

數上言吐蕃党項不可忽宜早為之備

不能用郭子儀之言為二虜人

京師張本數所角翻上時掌翻下同

辛丑遣兼御史大夫李之芳等使

于吐蕃為虜所留二年乃得歸

史究言之

羣臣三上表請

立太子五月癸卯詔許俟秋成議之丁卯制分河北

諸州以幽莫媯檀平薊為幽州管恒定趙深易為成德

軍管相貝邢洺為相州管魏博德為魏州管滄棣冀瀛

為青淄管懷衛河陽為澤潞管

自田承嗣李靈耀相繼叛亂諸鎮所管不復守

此制

六月癸酉禮部侍郎華陰楊綰上疏以為古之選

士必取行實

行下孟翻下行著同

近世專尚文辭自隋煬帝始置

進士科猶試策而已至高宗時考功員外郎劉思立始

奏進士加雜文明經加帖從此積弊轉而成俗朝之公

卿以此待士

朝直遙翻

家之長老以此訓子

長知兩翻

其明經則

誦帖括以求僥幸

帖括者舉人因試帖遂括取粹會為一書相傳習誦之以應試謂之帖括

又舉人皆令投牒自應如此欲其返淳朴崇廉讓何可

得也請令縣令察孝廉取行著鄉閭學知經術者薦之

於州

行下
孟翻

刺史考試升之於省任各占一經

占之
臆翻

朝廷

擇儒學之士問經義二十條對策三道上第即注官中

第得出身下第罷歸又道舉亦非理國

置道舉見二百
十四卷開元二

十五
年

望與明經進士並停上命諸司通議給事中李栖

筠左丞賈至京兆尹嚴武並與綰同至議以為今試學

者以帖字為精通考文者以聲病為是非

聲病謂以平
上去入四聲

緝而成文音從文順謂之聲反是則謂之病

風流頽敝誠當釐改然自東晉以

來人多僑寓士居鄉土百無一二請兼廣學校保桑梓

者鄉里舉焉在流寓者庠序推焉勅禮部具條目以聞

綰又請置五經秀才科 庚寅以魏博都防禦使田承

嗣為節度使承嗣舉管內戶口壯者皆籍為兵惟使老

弱者耕稼數年間有衆十萬又選其驍健者萬人自衛

謂之牙兵

魏牙兵始此迄于梁唐魏以之彊亦以之亡

同華節度使李懷

讓為程元振所譖恐懼自殺

乾元元年置陝虢華節度使上元元年改陝西節度

使分河中之同州與華州
為同華節度使華戶化翻


資治通鑑卷二百二十二



總校宮庶吉士臣侍朝

校對官檢討臣龔大萬

騰錄監生臣甄輔廷



財團法人
佛陀教育基金會
釋淨空 敬啟